

TUTÚ QUIHIⁿ NDAHA CUE ÑÁYIU HÈBREÚ

Dútú Ndiõxí ní cachí-gá sá Dèhe-gá cada núú-gă

¹ Te ndéé sanaha, Yá Ndiõxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchaa ñaní tnáhá-ó nǐ xindecu ndéé dàvá-áⁿ te ñu ducaⁿ nǐ quide-güedé. Te titní xito ducaⁿ nǐ xáhaⁿ-gă xii-güedé ní cáháⁿ-güedé tnúhu-gá. Te ndi ñíⁿ ndi ñíⁿ nǐ xítñúhu ñaha-gă xii-güedé nàcuáa cáháⁿ-güedé tnúhu-gá núú-yu.

² Te sáta nǐ cuu vai nduu ta yáha cuáháⁿ, te ní sáa nduu nǐ cachí Yá Ndiõxí sá Dèhe-gá cada núú-gă cáháⁿ tnúhu-gá núú-ó. Te ñu-ni mee-gă ní táúchíúⁿ nǐ cadúha Déhe-gá ñuyíú ndihi nchaa sá ió, te ní cachí-gá sá ncháá cùu-xi cuendá Déhe-gá. ³ Te Déhe Yá Ndiõxí ío càhnu cuu-gá dàtná càhnu cuu mee-gá, te dàtná-ni sàni iní méé-gă ñu-ni ducaⁿ sàni iní Déhe-gá chi tnáhá-gá cúú-gă Ndiõxí, te sá cuendá tnúhu càháⁿ Déhe-gá xíáⁿ ndécú-ní nchaa sá ió ñuyíú, te ducaⁿ chi ío càhnu cuu Déhe-gá, te ñu-ni Déhe-gá ní quide nàcuáa vá cündècu-gá cuèchi-o. Te sáta dúcáⁿ te ní ngóo-gá xio cùha Tátá-gă Dútú Ndiõxí Yaá ío cùnnu ndecu andi.

*Déhe Dútú Ndiõxí ío-gá cúnùu-gá dàcúúxí cuè
espíritú xínú cuèchi núú-gă*

⁴ Te Déhe Yá Ndiõxí ío-gá cúnùu-gá dàcúúxí cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiõxí sá ío-gá cunuu-gă

dàcúúxí cuè espíritú-áⁿ. ⁵ Chi Yá Ndiöxí ñá túú ní xáhaⁿ-gã xii ní ìⁿ cue espíritú xínú cuèchi núú-gã dàtná ní xáhaⁿ-gã xii Déhe-gá, te duha ní xáhaⁿ-gã: Yòhó cúú-n Déhe mee-ï, te ducaⁿ-ni cùndecu-n núú ndécù-í. Duha ní xáhaⁿ-gã. Te ní cachí tucu Yá Ndiöxí: Yúhú cúù-í Tătá Yàá-ăⁿ, te mee-gã cúú-gã Déhe-í. Duha ní cachí-gá. ⁶ Te cútnàhá ní tendaha-gã Déhe-gá Yaá ío cùnuu ní quixi-gá ñuyíú-a, te ní cachí-gá: Tàú-xi sá ncháá cuè espíritú xínú cuèchi núù-í chiñuhu-xi Déhe-í. Duha ní cachí-gá. ⁷ Te Yá Ndiöxí ní cáháⁿ-gá cuendá cue espíritú xínú cuèchi núú-gã, te ní cachí-gá: Yúhú quidè-í sá ncháá cuè espíritú xínú cuèchi núù-í cúú-xí dàtná táchí, te ðiu-ni cue espíritú-áⁿ quidè-í sá cúú-xí dàtná itá ñuhú. Duha càchí-gá. ⁸ Dico Déhe-gá chi ñá túú dùcaⁿ ni xáhaⁿ-gã, chi duha ní xáhaⁿ-gã: Yòhó tnàhá-n cùu-n Ndióxí dàtná cúú yúhú Yaá cúú Tătá-n, te ducaⁿ-ni tàxi tnuní-n nì caa ni quíhíⁿ, te ío váha ndáá quidé-n tàxi tnuní-n. ⁹ Te dàquee tihú-n nchàa sá cuèhé sá dúhá, te cùu iní-n nchàa sá vãha, núu xíãⁿ yúhú Yaá cúú Tătá-n ñí quide-í sá ïo-gá vii ío-gá váha cuu iní-n, dàcúúxí nchàa dava-gá ñáyiu ndècu ndìhi-n. Duha ní xáhaⁿ-gã xii Déhe-gá. ¹⁰ Te ní xáhaⁿ tucu Yá Ndiöxí xii Déhe-gá:

Yòhó cúú-n Yàá ío cùnuu, chi ndéé cútnàhá ñá túú vèdana ná íó te ní cadúha-n ñùyíú ndihí andíu.

11 Te andíu ndihí ñùyíú chi naa-xi, dico yòhó chi cundecu-ni-n nì caa ni quíhíⁿ.

Te andíu ndihí ñùyíú chi ndihí-xi dàtná ndíhí ìⁿ dóó,

12 te dàtná cuíní-n quìde ñáyíu ndihí ìⁿ dóó òré ndàcáⁿ tnáhnú-yu tàxi ndecú-yu ìⁿ xio, ducaⁿ càda-n ñùyíú ndihí andíu,

te dàtná nádăma dóó ñáyíu ducaⁿ càda tucu-n ñùyíú ndihí andíu.

Te yòhó dàtná-ni càa-n ndecu-n vitna ducaⁿ-ni cùnduu-n cundecu-n ni caa ni quíhíⁿ, chi vá yíí tnàhí-n.

Duha ní xáhaⁿ Yă Ndiǒxí xii Déhe-gá. 13 Te Yă Ndiǒxí ñá túú ní xăhaⁿ-gă xii ni ìⁿ cue espíritú xínú cuèchi núú-gă dàtná ní xáhaⁿ-gă xii Déhe-gá, te duha ní xáhaⁿ tùcu-gá:

Ngóo xio cùha-í taxi tnùní-n,

te yúhú cada-í te nchaa sá cúú ũhú iní ñáhá xii-n canehe-xi sá yíñùhu núú-n.

Duha ní xáhaⁿ-gă xii Déhe-gá. 14 Te nchaa espíritú xínú cuèchi núú Yă Ndiǒxí mee-ni chiùⁿ-gá quídé-xí, chi tëndaha-gá cue espíritú-áⁿ cuăháⁿ-xi nchaa núú ndécú cuè ñáyíu ní nduu táhú cundecu ndihí-gá chindee ñàha-xi xií-yu.

2

Vá dáñá ndéé-ó tnũhu sá càháⁿ nàcuáa naníhí tànhú-ó

1 Te sá cuendá sá ïo cùnuu Xítóhó Jesucrìstú, núu xíǎⁿ ío xìnì ñuhu-xi cada cuendá-ó nchaa tnúhu càháⁿ-gá sá sà ní xíndedóho-o cuendá sá vǎ dáñá ñihnu-o. 2 Te cue espíritú xínú cuèchi núú Yǎ Ndiǒxí ní cáháⁿ-xi tnúhu-gá ndéé sanaha, te tnúhu ní cáháⁿ cue espíritú-áⁿ cúú-xí sǎ ndáá cuítì. Te nchaa ñáyiú ñá túú ní cuìní tñi nchaa tnúhu ní cáháⁿ cue espíritú-áⁿ, te ni ñà túú ní cuìní-yu cund-edóho-yu, nchaa ñáyiú-áⁿ ñi nacháhu-yu nàcuáa ndùu nchaa cuèchi ní quidé-yu ñi ñi-yu. 3 Te sá dúcáⁿ ñi yáha cue ñáyiú-áⁿ, xíǎⁿ cútnùní ndáá iní-ó sǎ vǎ cǎcu ñihnu-o te núu na dàña ñihnu-o tnúhu sá càháⁿ nàcuáa naníhí tàhú-ó, tnúhu sá ïo cùnuu, chi nacháhu-o te núu ducaⁿ na càda-o. Te díhna-gá Xítóhó Jesucrìstú ní cáháⁿ-gá tnúhu-áⁿ te nchaa ñáyiú ní xíndedóho nchaa nàcuáa ndùu tnúhu-áⁿ ñi cáháⁿ ndáá-yu tnúhu-áⁿ nùú-ó. 4 Te tnàhá Yǎ Ndiǒxí cúndìhi-gá nchaa ñáyiú-áⁿ quidé-gǎ nàcuáa cutnùní iní-ó sǎ tnúhu-áⁿ cúú-xí tnúhu ndáá, chi quide-gá títñi núú sǎ vǎ yǒo tnàhí ndàcu cada te ío cùñúhu-o. Te Espíritú Yǎ Ndiǒxí quidé-xí nàcuáa nduú tàhú-ó ndì dííⁿ nùú chiuⁿ cada-o nàcuáa cuìní méé-gǎ. Te sá dúcáⁿ quide Yá Ndiǒxí nchaa xíǎⁿ, xíǎⁿ cútnùní iní-ó sǎ tnàhá-gá càháⁿ-gá sá tnúhu-áⁿ cúú-xí tnúhu ndáá.

Xítóhó Jesucrìstú ní xínduu yiqui cùñú-gá dàtná cáá yiqui cuñú nchoo cuè ñáyiú ñuyúú-a

5 Te Yá Ndiǒxí vá táxí ndècu-gá cue espíritú xínú cuèchi núú-gǎ taxi tnùní-xi ñuyúú sáá sǎ vǎtá quìní-gá-ó, te diu cuendá xíǎⁿ càháⁿ-í. 6 Te núú tùtú Yǎ Ndiǒxí càhí-xi:

Yòhó Dútú Ndiõxí ñá túú nă cúú cuè ñáyiu ñuyíú
nũu ndacu iní-n-yu, àdi chindeé-n-yu.

⁷ Te yòhó ní cachí-n sǎ nchàa ñáyiu ñuyíú-a vá
cúnùú-yu dàtná cúnùu cue espíritú xínú
cuèchi núú-n,

dico ní cachí-n sǎ sàá nduu te ío cunùú-yu
tnàhá-yu, te mee-n cǎháⁿ-n sǎ ïo cǎhnu
cuú-yu,

te ní cachí tucu-n sǎ táxí tnùní-yu nchaa sá ñ
cadúha-n.

⁸ Te ducaⁿ nchàandi túhú sá ìó quíndàhá-yu.

Duha cǎchí-xi núú tútú-gá. Te sá dúcáⁿ ñ cachí Yǎ
Ndiõxí sá quíndàha ñáyiu ñuyíú nchaa sá ìó, xǎⁿ
cútnùní sá ncháándi túhú sá ìó taxi tnùní-yu, dico
vátá sàá-gá nduu dùcaⁿ quíní-ó càda-xi. ⁹ Te nchoo
sa nàha-o sá tnáá-ní ñ quide Yá Ndiõxí cuendá
sá vǎ cúnùu Xítóhó Jesucristú dàtná cúnùu cue
espíritú xínú cuèchi núú-gǎ. Te ducaⁿ ñ quide Yá
Ndiõxí chi ní cundàhú iní-gá nchaa ñáyiu ñuyíú-a,
chi ní cachí-gá sá Dèhe-gá cuú cuendá nchaa-yu, te
Xítóhó Jesucristú ío ní ndoho-gá òré ní xíhí-gá, núu
xǎⁿ ní nduu táhú-gǎ cúnùu vihi-gá vitna. Te mee
Yǎ Ndiõxí cǎchí-gá sá ïo cǎhnu cuu Déhe-gá.

¹⁰ Te Yá Ndiõxí ní cadúha-gá nchaandi túhú sá ìó
nàcuáa ní cachí iní méé-gǎ, te sá dúcáⁿ ñ quide-gá
nũu xǎⁿ váha-ni sá ñ cachí-gá sá Xítóhó Jesu-
cristú nándi ndoho-gá te cuú-gá cuendá ducaⁿ ñà
túú tnàhí-gá ná cùmání-gǎ núú Yǎ Ndiõxí. Te sá
dúcáⁿ ñ cuu núu xǎⁿ ní níhí Yǎ Ndiõxí nàcuáa
cada-gá cǎndeca-gá nchaa ñáyiu cùu déhe-gá quíhíⁿ
núú ïo váha cǎa cundecú-yu ndihí-gá ñi caa ñi
quíhíⁿ. Te Xítóhó Jesucristú cúú-gǎ Yaá ní quide

nàcuáa nduu táhú cue ñáyiú cundecú-yu ndihi Yá Ndiöxí. ¹¹ Te Xítohó Jesucristú cúú-gã Yaá quidé ndècu yiñuhu ñáyiú núú Yã Ndiöxí ñáyiú sàndáá iní ñáhá xii-gá, te Xítohó Jesucristú ndihi cue ñáyiú-áⁿ ñⁿ-ni Yáá cúú Tãtã-yu ndihi-gá, núú xíãⁿ Xítohó Jesucristú Yaá cúú Dèhe Dútú Ndiöxí ñá túú cùcahaⁿ núú-gã càháⁿ-gá sá ñàní-gá ndihi cúha-gá cúú nchàa ñáyiú-áⁿ. ¹² Te quèe ndáá-xi nàcuáa càháⁿ-xi núú tùtú Yã Ndiöxí núú càchí-xi nàcuáa ní xáhaⁿ Xítohó Jesucristú xii Tãtã-gá Dútú Ndiöxí, te duha ní xáhaⁿ-gã:

Cáháⁿ váha-í cuendá-n núú nchàa cue tée cùu datná ñàní-í ndihi núú nchàa cue ñáyiú ñíhí cúú dàtná cúha-í,

te cata-í ndudú chiñuhu ñaha-í xii-n núú tàcá-yu. Duha yòdo tnuní núú tùtú-gá nàcuáa ní xáhaⁿ Dèhe-gá xii-gá. ¹³ Te ingá tucu xichi núú tùtú Yã Ndiöxí càháⁿ-xi nàcuáa ní càháⁿ Xítohó Jesucristú cuendá-gá, te duha ní cachí-gá:

Yúhú nchaa-ni nduu quindáá iní-í Tãtã-í Dútú Ndiöxí.

Duha càchí-xi núú tùtú Yã Ndiöxí nàcuáa ní càháⁿ Xítohó Jesucristú. Te ingá tucu xichi núú tùtú Yã Ndiöxí càháⁿ-xi nàcuáa ní càháⁿ tucu Xítohó Jesucristú, te duha ní cachí-gá:

Iha ndècu ndihi-í nchaa ñáyiú cùu déhe Tãtã-í Dútú Ndiöxí, te ñíu-ni ñáyiú-áⁿ ñí taxi cuendá Tãtã-í cuu cuendá-í.

Duha càchí-xi núú tùtú-gá nàcuáa ní càháⁿ Xítohó Jesucristú.

¹⁴ Te sá cuendá nchaa ñáyiú cùu déhe Yá Ndiöxí cúú-yu yiqui cùñú, núú xíãⁿ ducaⁿ tnàhá Xítohó Jesucristú ní cuu-gá yiqui cùñú, te ducaⁿ ñí

cuu-gá yiqui cùñú cuèndá cuú-gá, te sá dúcáⁿ cùú-gá te ndacu-gá daquèe tíhú-gă sácuihná, te ñiu sácuihná-ăⁿ quidé-xí xihí ñáyiu. ¹⁵ Te ducaⁿ ñi quide-gá cuèndá sá cuè ñáyiu ñuyúú-a vá yùhú-gá-yu sá cùú-yu, chi nchaa-ni nduu yùhú-yu sá cùú-yu. ¹⁶ Te na càchí tnúhu ndáá-í sá Xítohó Jesucristú ní quixi-gá cuèndá chindee-gă cue ñáyiu cùu ñaní tnáhá ndi Àbrahám, te ñá díú cuèndá sá chindèe-gá cue espíritú xínú cuèchi núú Yă Ndiöxí. ¹⁷ Te cuèndá xiăⁿ nũu dai ní xini ñuhu-xi sá cúú-gă ñáyiu cuèndá yăha-gá nândi sá yăha-gá dàtná yăha cue ñáyiu cùu ndi mee-gá cuèndá ducaⁿ cùu-gá dútú ïo cùnuu te cuu ndáá-gá núú Yă Ndiöxí, te cundàhú iní-gá nchaa ñáyiu te cuú-gá cuèndá sá vă cùndècu-gá cuèchi-yu núú Yă Ndiöxí. ¹⁸ Te mei òré ndóhó Xítohó Jesucristú ní xito ndéé ñáhá sàcuíhná xii-gá te núu ndisa sá vă cáda-gă ni ñⁿ sá ñà túú tàú-gá cada-gá, te sá dúcáⁿ ñi ndoho-gá xiăⁿ nũu ndácú-gă chindèe-gá nchaa ñáyiu ducaⁿ yăha.

3

Xítohó Jesucristú ïo-gá cùnùu-gá dàcúúxí ndi Moisés

¹ Te nchòhó cúú-ndó ñáyiu ndècu ndihi-í ichi Xítohó Jesucristú ñáyiu cùu cuendá Yă Ndiöxí, te tnáhá-ndó cùu-ndo ñáyiu ní cáháⁿ ñáhá-gă cuèndá cundecu-ndo ndihi-gá. Te yúhú càchí tnúhu-í xii-ndo sã ïo váha cada cuèndá-ndó nàcuáa ndùu cuendá Xítohó Jesucristú, chi ñiu-gá cúú-gă Yaá ní tendaha ñàha Dútú Ndiöxí ní quixi-gá ñuyúú-a, te ñiu-gá cúú-gă Dútú ïo cùnuu chi quide-gá núú Yă Ndiöxí. Te ñiu-ni cuèndá Xítohó Jesucristú càháⁿ

tnúhu sá ni sàndáá iní-ó. ² Te mee Yă Ndiöxí ní sáha chiuⁿ-gá Xítóhó Jesucristú, te ío ndáá quidé-gă chiuⁿ-áⁿ sá cúú-xí Yă Ndiöxí, te diu-ni ducaⁿ nĩ quide ndíi Moisés ní quide ndíi chiuⁿ ní táhú Yă Ndiöxí, te ío ndáá ní quide ndíi chiuⁿ-gá sá cúú-xí nchàa ñáyiu cùu cuendá-gá, te cue ñáyiu-áⁿ cúu-yu dàtná vehe mee-gă. ³ Te ìⁿ tée dàcaa ìⁿ vehe váha ío càhnu-gá cúú-dě dàcúxí vèhe dacao-dé. Te ducaⁿ sãtnhá-xi cùu Xítóhó Jesucristú chi ío-gá càhnu cuu-gá dàcúxí ndíi Moisés. ⁴ Te nchoo sã naha-o sá ncháá vèhe dacuití ndècu cue téé ní dácáá, dico sa nàha tucu-o sá Yă Ndiöxí quidé-gă ndécú nchàa sá ío ñuyú-a. ⁵ Te ndíi Moisés-áⁿ ìo ndáá ní quide ndíi chiuⁿ ní táhú Yă Ndiöxí ní quide ndíi sá cúú-xí nchàa ñáyiu cùu cuendá-gá. Te sá dúcáⁿ nĩ quide ndíi xíáⁿ ní cuu ndíi ìⁿ téé ní xinu cuechi nũú Yă Ndiöxí. Te ní xáhaⁿ ndíi xii nchaa ñáyiu cùu cuendá-gá nàcuáa cáháⁿ-gá ndéé cuéé-gá. ⁶ Dico Xítóhó Jesucristú cúú-gă Déhe mee Yă Ndiöxí, te cùu-gá Yaá ío quide ndáá yíndàha-gá nchaa ñáyiu cùu cuendá Yă Ndiöxí. Te tnàhá-ó cùu-o ñáyiu cùu cuendá-gá, te diu-ni ducaⁿ cùu cuendá ñáhá-gă xii-o te núu na càncicúⁿ nihnu-ni-o càni ndáá iní-ó cuendá-gá ndéé ná sàá nduu ngündecu-o ndíi-gá.

Cue ñáyiu cùu cuendá Yă Ndiöxí ío váha cùu iní-yu ndécú-yu ndíi-gá

⁷ Te núú tütú Yă Ndiöxí yódó tnùní nàcuáa ní cáháⁿ Espíritú-gá, te duha ní cachí-xi:

Te núu nchòhó ndèdóho-ndo nchàa tnúhu càháⁿ Yă Ndiöxí vitna,

8 te vá cúndùu sáá iní-ndó dàtná ní xínduu sàá iní ñáyiu ní dáquéé tǎhú tnǎhu Yá Ndiǒxí, ñáyiu ní xíndecu xítí yucu, chi ñáyiu-áⁿ ñǎ xito ndeé-yu Yá Ndiǒxí nǎu nása cada ñaha-gǎ xíí-yu.

Duha ní cachí Espíritú-gá. 9 Te cǎchí tucu Espíritú Yǎ Ndiǒxí nǎcuáa ní cáháⁿ méé-gǎ, te duha ní cachí-gá:

Xítí yucu ní xito ndeé ñáhá cuè ñaní tnáhá-ndó ñǎ xíndecu ndeé sanaha xíí-í, te ducaⁿ ñǎ quide ñáhá-yu cuèi ní xiní-yu nchaa sá ñǎ quide-í ndi ùdico cuía ñǎ xíndecú-yu xítí yucu-áⁿ.

10 Te sá dúcáⁿ ñǎ quidé-yu núu xíǎⁿ ní cudèèⁿ-í núǎ-yu,

núu xíǎⁿ ní cáháⁿ-í cuèndá-yu, te ní cachí-í:

“Ñáyiu-a quide-ní-yu nchaa sá ñà túú tàú-yu cadá-yu te ni ñà túú cuìní-yu cadá-yu nchaa nǎcuáa sàni iní-í,

te ni ñà túú cuìní-yu cadá-yu nǎcuáa cǎháⁿ-í”,

duha ní cáháⁿ-í cuèndá-yu.

11 Te xíǎⁿ nǎu ní cudèèⁿ-í núǎ-yu te ní xáhaⁿ ndǎá-í xíí-yu sá vǎ ndúú tǎhǎ-yu cundecu váha-yu núú ndécù-í.

Duha ní cachí Yǎ Ndiǒxí cǎchí Espíritú-gá.

12 Te nchòhó ñáyiu ndècu ndihi-í ichi Xítóhó Jesucristú, cáháⁿ-í dóho-ndo sǎ ïo cada cuèndá-ndó vǎ cání cuèhé iní-ndó te ngóo-ndo vǎ quíndáá-gá iní-ndó Yǎ Ndiǒxí te dañá-ndo ìchi-gá, te diu-gá cúú-gǎ Yaá ndécú nchàa nduu nchaa quíú. 13 Te ñⁿ nduu ñⁿ nduu ío chí cuǎha tnàha tnúhu ndee iní cundecu-ndo ñini ndecu-ndo ñuyíú-a cuèndá sá vǎ

xĩnu iní-ndó càda-ndo nándi sá cuèhé sá dúhá, te ducaⁿ te vá cúú sàá iní-ndó nũú Yă Ndiõxí. ¹⁴ Te vá dáñá ndèé-ó càni ndáá iní-ó nàcuáa cada ñaha Yă Ndiõxí xii-o, te dàtná-ni ní sani iní-ó ndèé cùtnàhá ní tuha-o ìchi Yă Ndiõxí, te ñiu-ni ducaⁿ càni iní-ó ndèé ná sàá nduu vǎ cùndècu-gá-ó ñùyíú-a, te núu ducaⁿ na càda-o te cùu ñⁿnuu-o ndihí Xítohó Jesucristú.

¹⁵ Te duha càháⁿ-xi ñⁿ xichi núú tùtú Yă Ndiõxí: Te núu nchòhó ndèdóho-ndo nàcuáa càháⁿ Yă Ndiõxí vitna, te vá cùndùu sàá iní-ndó dàtná ní xĩnduu sàá iní cue ñáyiu ní dáquée tĩhú tnũhu-gá ndée sanaha. Duha càchí-xi núú tùtú-gá. ¹⁶ Te cue ñáyiu ducaⁿ nĩ xĩnduu sàá iní-xi cùú-yu ñáyiu ní ndeñuhu ndíi Moisés nacióⁿ Ēgíptú, te ñáyiu-áⁿ nĩ xĩndedóho-yu tnúhu ní cáháⁿ Yă Ndiõxí te ní quide sàá iní-yu ní dáquée tĩhũ-yu tnúhu-gá. ¹⁷ Te ndi ùdico cuíá nĩ xúhuⁿ-yu ichi ío ní cùdééⁿ Yă Ndiõxí núú-yu cuendá sá nĩ quidé-yu nándi nchaa sá cuèhé sá dúhá, te ñáyiu-áⁿ nĩ xíhí-yu xití yucu. ¹⁸ Te nchaa ñáyiu-áⁿ ñà túú ní cuíní-yu tníⁿ-yu tnúhu ní cáháⁿ Yă Ndiõxí nũu xíáⁿ ní cáháⁿ ndáá-gá sá vǎ ndúú tǎhũ-yu cundecú-yu núú ïo váha càa ndecu-gá. ¹⁹ Te xíáⁿ nũu nchoo cùtnuní iní-ó sǎ nchàa ñáyiu-áⁿ ñà túú ní ndùu tǎhũ-yu cundecu váha-yu núú ndécú-gǎ, chi ñá túú ní sàndáá iní-yu tnúhu ní cáháⁿ-gá.

4

¹ Te vitna ndècu ndihí-gá-ó tnũhu Yă Ndiõxí tnúhu sá dánèhé ñáhá xii-o sá cúú cùndecu váha-o nũú ndécú-gǎ, te tàú-xi quiyùhú iní-ó chi na cuáháⁿ te vá ndúú tǎhú-ó cùndecu váha-o nũú ndécú-gǎ. ² Te tnàhá nchoo nĩ ngúndecu ndihí-o

tnũhu sá cãháⁿ nãcuáa naníhí tãhú-ó dàtná ní xíndecu ndíhi cue ñáyiú ndéé sanaha, dico ñáyiú-án chi ñá túú vëdana ni nãndíhi-xi cuëi ní xíndedóho-yu tnúhu-án chi ñá túú ní sãndáá iní ñáhã-yu xii-gá. ³ Dico nchoo cùu-o ñáyiú ní sãndáá iní tnúhu Yá Ndiõxí, núu xiãⁿ nduu táhú-ó cùndecu váha-o núú ndécú-gã, te ní quee ndáá-xi nãcuáa cãháⁿ-gá núú tütú-gá núú cãchí-xi:

Yúhú ní cudèèⁿ-í núũ-yu, te ní cãháⁿ ndáá-í sá vã ndúú tãhũ-yu cundecu váha-yu núú ndécù-í.

Duha ní cachí-gá. Te cuu nduu táhũ-yu cundecu váha-yu núú ndécú Yã Ndiõxí ní cùu, chi sa ní xínu cava nchaa chiuⁿ ní quide-gá sá ñ cadúha-gá ñuyíú. ⁴ Te núú tütú Yã Ndiõxí cãháⁿ-xi nãcuáa ní quide-gá nduu úsá, te duha cãchí-xi:

Yá Ndiõxí ní quide chiuⁿ-gá ñnú nduu ní quide-gá nchaa chiuⁿ-gá te ní ndetatú-gá nduu úsá.

Duha cãchí-xi núú tütú-gá. ⁵ Te cãchí tucu-xi núú tütú Yã Ndiõxí nãcuáa ní cãháⁿ-gá cuëndá cue ñáyiú ndéé sanaha, te duha ní cachí-gá:

Cue ñáyiú-a vá ndúú tãhũ-yu cundecu váha-yu núú ndécù-í ndétátú-í.

Duha ní cachí-gá. ⁶ Te ñáyiú ní xíndedóho tnúhu sá cãháⁿ nãcuáa naníhí tãhú-ó ndéé sanaha, ñá túú ní ndùu táhũ-yu cundecu váha-yu núú ndécú Yã Ndiõxí ndétátú-gá, te ducaⁿ chi ñá túú ní sãndáá iní ñáhã-yu xii-gá, dico íó-gá ñáyiú nduu táhú cundecu váha núú ndécú-gã ndétátú-gá. ⁷ Te ní xica cuéhé nduu sá dúcãⁿ ñà túú ní sãndáá iní ñáhã ñáyiú-án xii-gá, te dãtnùní ní cãháⁿ ndíi Dàvíí yuhu-gá nãcuáa cada-gá vitna, te dũu-ni nãcuáa sa

yòdo tnuní diu-ni ducaⁿ chìdo tnuní tucu-í nàcuáa ní cáháⁿ ndíi yuhu-gá, te duha ní cachí-gá:

Te núu nchòhó ndèdóho-ndo tnũhu càháⁿ-í te vá cádá sàá iní-ndó.

Duha ní cachí-gá. ⁸ Te ndíi Jòsué ní sanu ichi ndíi ñáyiú núú quíhíⁿ-yu cundecu váha-yu, dico ñá díú cuendá xiǎⁿ ní cáháⁿ Yă Ndiǒxí, chi cuendá nàcuáa cada-gá vitna ní cáháⁿ-gá. ⁹ Núu xiǎⁿ sáá nduu ndùu táhú nchaa ñáyiú cùu cuendá Yă Ndiǒxí ngúndecu váha-yu núú ndécú-gă ndétátú-gá. ¹⁰ Te nchaa ñáyiú ducaⁿ na ndùu táhú cundecu váha núú ndécú Yă Ndiǒxí ndétátú-gá, te tnàhá-yu nde-tatú-yu cuendá nchaa sá vǎha ní quidé-yu dàtná ndétátú méé-gă. ¹¹ Te xini ñuhu-xi sá nchóó ïo nducu ndèe-o nducu-o nacuáa cada-o cuendá nduu táhú-ó ngúndecu váha-o núú ndécú Yă Ndiǒxí ndétátú-gá, chi na cuáháⁿ dava-ndo càda-ndo datná ní quide cue ñáyiú ñá túú ní sàndáá iní ñáhá xì-gá, te vá ndúú táhú-ndó cùndecu váha-ndo núú ndécú-gă te núu ducaⁿ na càda-ndo.

¹² Te tnúhu Yă Ndiǒxí cúú-xí dàtná ìⁿ sá nchító-ó chi quide-xi nándi sá quidé-xí, te cùu-xi datná ìⁿ sá děéⁿ víhí-gă dàcúúxí ìⁿ yuchí sá ndèé úú xio núú-xi. Te ducaⁿ sǎtnahá-xi cùu tnúhu-gá chi quée-xi iní-ó, te dándixi túu-xi nchaandí túhú sá sání iní-ó te núu quide váha-o àdi ñá túú quide váha-o ndècu-o. ¹³ Te ni ìⁿ sá ñi cadúha Yă Ndiǒxí vá cáni iní-ó sǎ ndácú-xí nguivǎha-xi núú-gă, chi nchaandí túhú sá sání iní-ó ndècu túu-xi núú-gă, te diu núú Yàá-áⁿ na càni cuendá-ó nchaa sá quidé-ó.

Xítóhó Jesucrístú cúú-gă Dútú ïo cùnuu

14 Te Xítohó Jesucrístú cúú-gă Dútú ïo cùnuu ndecu ndihì-o, te ðiu-gá cúú-gă Déhe Dútú Ndiöxí, te Yaá-áⁿ cuãndaa-gá andiu ní nucúndecu-gá núú Yă Ndiöxí, núu xiăⁿ tàú-xi sá cáncìcúⁿ nihnu-ni-o quìndáá iní-ó-gă. 15 Te mee Yàá-áⁿ ïo cùnuu-gá cúú-gă dútú-ó ndècu ndihì-o, te ío na cùndahú iní ñáhá-gă xii-o cuendá sá ñă nihí ndéé-ó cùndecu-o. Te ducaⁿ càda-gá chi ní yáha-gá ðàtná yăha mee-o, chi nchaa sá ñi yáha-gá-áⁿ ñi cuu-xi sá cáda-gă nándi nchaa sá cuèhé sá dúhá ní cùu dico ni ñⁿ ñá túú ní quìde-gă. 16 Núu xiăⁿ tàú-ó sã nchóó ñi yuhu ñi iní-ó cãháⁿ ndihì-o Yă Ndiöxí Yaá ío cùndahú iní ñáhá xii-o chindee ñaha-gá, te ducaⁿ càda-o te cundàhú iní ñáhá-gă chindee ñaha-gá xii-o ndèda-ni càa oré xíní ñùhu-o-gă.

5

1 Te nchaa cue dútú cùnùu núú ñăyiu isràel ðiu-ni ñăyiu cùu-güedé, te ducaⁿ ñi ngúndecu-güedé cuendá cada-güedé chiⁿ sá cúú-xí Yă Ndiöxí cuendá-yu, chi ðiu cue téé-áⁿ ñi xóo nacani cuendá-güedé núú-gă quiti ní xóo cahni-güedé ní xóo nduu táhú-gă, te ducaⁿ ñi xóo cada-güedé cuendá sá cáda càhnu iní Yă Ndiöxí cuéchi-yu, te ducaⁿ ñi xóo nacani cuendá tucu-güedé núú-gă nchaa dava-gá sá ñi xóo níhí-güedé ní xóo nduu táhú-gă. 2 Te nchaa cue dútú-ăⁿ ñi xóo cundee ñi-güedé nchaa sá ñi xóo cada nchaa ñăyiu ñá túú ní quìde ndáá ñăyiu ñá túú cùtnuní iní-xi, te ducaⁿ ñi xóo cada cue dútú-ăⁿ chi tnàhá-güedé ñá túú ní xóo níhí ndéé-güedé cundecu-güedé cuendá nchaa sá ñi xóo yáha-güedé. 3 Te sá cuendá sá dúcáⁿ ñá túú ní xóo níhí ndéé-güedé núu xiăⁿ dai

ní xini ñuhu-xi sá tnàhá-güedé cuáha-güedé Yá Ndiöxí sá ndúú tǎhú-gǎ cuendá méé-güedé dàtná quidé-güedé cuendá ñayi.

⁴ Te ni ñⁿ téé vá ndácú-dě cuu-dé dútú cúnùu cuendá-ni sá cǎchí iní méé-dě te núu ñǎ díú mèe Yá Ndiöxí ducaⁿ cuiní-gǎ sá cúú-dě dútú cúnùu datná ní quide-gǎ ndíi Àrón. ⁵ Te cuèi Xítóhó Jesucrístú chi ñǎ díú mèe-gǎ ní quide-gǎ méé-gǎ ñⁿ dútú cúnùu nacúáa cada nínu-gǎ méé-gǎ, chi mee Tǎtá-gǎ Dútú Ndiöxí ducaⁿ ñí cachí-gǎ sá cúú-gǎ Dútú cúnùu, te ducaⁿ chi Yá Ndiöxí ní xáhaⁿ-gǎ:

Yòhó cúú-n Dèhe-í,

te cuiní-í sá dúhá-ní cùndecu-n núú ndécù-í. Duha ní xáhaⁿ-gǎ xii Xítóhó Jesucrístú. ⁶ Te núú tütú Yá Ndiöxí yódó tnùnì nàcuáa ní xáhaⁿ tùcu-gǎ xii Xítóhó Jesucrístú, te duha ní xáhaⁿ-gǎ:

Yòhó cúú-n dütú cundecu ni caa ni quíhíⁿ,

te cùu-n datná ní cuu ndíi Melquisèdec.

Duha ní xáhaⁿ-gǎ xii Xítóhó Jesucrístú. ⁷ Te cúnàhá ní xíndecu Xítóhó Jesucrístú ñuyíú-a te níhi ní xóo cáháⁿ ndihí-gǎ Yá Ndiöxí te ní xóo cáháⁿ ndàhú-gǎ núú-gǎ, te ní xóo ndáhyú-gǎ òré ducaⁿ ñí xóo cáháⁿ ndihí-gǎ Yá Ndiöxí, te ducaⁿ ñí quide-gǎ chi nàha-gǎ sá Yá Ndiöxí cúú-gǎ Yaá ndacu dàcácu nihnu ñaha xii-gǎ cuendá sá vǎ cùú dúcáⁿ-gǎ. Te Yá Ndiöxí ní xíndedóho-gǎ nchaa tnúhu ní cáháⁿ Xítóhó Jesucrístú cuendá sá ñí quide-gǎ nchaa nàcuáa ní xáhaⁿ Yá Ndiöxí cada-gǎ. ⁸ Te sá cuendá nchaa sá ñí ndoho Xítóhó Jesucrístú xǎⁿ ní cutnùnì iní-gǎ cada-gǎ nchaa dava-gǎ sá vǎha nàcuáa cuiní méé Yá Ndiöxí cada-gǎ. Te ducaⁿ ñí cuu cuèi cùu-gǎ Déhe Yá Ndiöxí. ⁹ Te sá dúcáⁿ ñí quide-gǎ nchaa

nàcuáa cuení méé Yă Ndiöxí, xíăⁿ nŭu vitna cùu-gá Yaá dácăcu nihnu nchaa ñáyiū sàndáá iní ñáhá xii-gá núú ùhú núú ndàhú. ¹⁰ Te mee Yă Ndiöxí ní cachí-gá sá Xítohó Jesucrìstú cúú-gă dútú cúnūu datná ní cunuu ndíi Melquisèdec cútñàhá ní cuu ndíi dútú ñuyíú-a.

Cuèndá ñáyiū cuení dañà nihnu ichi Yá Ndiöxí

¹¹ Te vâi-gá tnúhu ndècu cáháⁿ-í nàcuáa ndūu cuendá Xítohó Jesucrìstú, ndihí ndíi Melquisèdec, te dícó-ni sá nchòhó ío cuèé tècú tnùnì-ndó, te yúhú ío úhú nihí-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuéhé ndūu ndècu-ndo ichi Xítohó Jesucrìstú, te tàú-ndó dānehé-ndó cuè ñáyiū ndècu ichi-gá tnúhu-gá nŭu dícó sá cúú, dico xìni ñuhu-ni-xi sá cúndècu ñáyiū danèhé ñáhá tnŭhu-gá xii-ndo, tnúhu sá ñí dācuáhá-ndó ndéé dīhna sá ñà túú ũhú tecú tnùnì-ndó. Te sá dúcáⁿ quide-ndo núu xíăⁿ cúú-ndó dàtná cue landú vitna sàdi camá, landú vátá cúú-gă caxi dítá. ¹³ Chi nchaa ñáyiū cūu datná landú vitna sàdi, ñáyiū-áⁿ cúú nèñuú-yu ñá túú cùtnuní iní-yu nàcuáa cáháⁿ tnúhu sá cáháⁿ nàcuáa cada ndáá-yu cundecú-yu.

¹⁴ Te nchaa sá vátá cúú-gă caxi cue landú yíquíⁿ xíăⁿ cúú-xí cuèndá cue ñáyiū sacuéhé, te xíăⁿ cúú-xí dàtná tnúhu sá dācuàha ñáyiū sa ní níhí ndéé ndècu ichi-gá, ñáyiū sa ní cutnùnì váha iní-xi nándi cūu nchaa sá cuéhé sá dúhá, ndihí nándi cūu nchaa sá vāha.

6

¹ Te xíăⁿ nŭu vitna xìni ñuhu-xi dacuaha-o dava-gá tnúhu Yá Ndiöxí cuèndá ducaⁿ te cuu-o ñáyiū tècú tnùnì nchaa tnúhu-gá. Te xìni ñuhu-xi

sá ncháá tnũhu Xítóhó Jesucristú sá nĩ dáciuáhá-ó ndèé díhna vá dáciuàha-gá-ó dàtná ní dáciuáhá-ó chi sa tècú tnùnì-ó. Te ñá túú-gã xíní ñũhu-xi dacuaha-o datná ní dáciuáhá-ó ndèé díhna náciuá cada-o ndixi cuéchi iní-ó cuendá nchaa sá cuèhé sá dúhá quide-o, sá tá dáciuíta nihnu ñaha xì-o cuáháⁿ ní cùu. Te ducaⁿ vã dáciuàha-gá tucu-o dàtná ní dáciuáhá-ó ndèé díhna náciuá cada-o quindáá iní-ó Yã Ndiõxí,² ndihì cuendá náciuá ní dáciuáhá-ó náciuá cuandute-o, ndihì cuendá náciuá cada-o càcáⁿ ndodo-o ndàha-o díquí ñáyiú ní sándáá iní ñáhá xì-gá. Te ducaⁿ ñà túú-gã xíní ñũhu tucu-xi dacuaha-o datná ní dáciuáhá-ó ndèé díhna cuendá náciuá ndoto cue ñáyiú ní xihí, ndihì cuendá náciuá ní dáciuáhá-ó sã Yã Ndiõxí daquihíⁿ-gá ñáyiú núú ùhú núú ndàhú ni caa ni quíhíⁿ.³ Te núú Yá Ndiõxí ná càchí-gá, te cuita dáciuàha-gá-ó nchàa dava-gá tnúhu sá cúmání quíhíⁿ.

⁴ Te cue ñáyiú sa tècú tnùnì tnúhu Yá Ndiõxí, ñáyiú sa xìní nchaa náciuá ndùu nchaa sá vãha quide ñaha Yá Ndiõxí xii-o ndihí-yu, ñáyiú sa chindee ñaha Espíritú Yã Ndiõxí,⁵ ñáyiú sa cùtnunì iní-xi sá ïo váha tnúhu Yá Ndiõxí, ñáyiú sa xìní náciuá ta quide Yá Ndiõxí véxi nchaa sá vã yõo tnàhí ndàcu cada,⁶ te núú ñáyiú-áⁿ ná ngũíta tucú-yu daquèe tíhú duúⁿ-yu tnúhu Yá Ndiõxí, te vá ndácú-gã-ó nà canu ichi-ó-yu náciuá ndixi cuéchi iní-yu te núú ducaⁿ na càdá-yu, te sá dúcáⁿ ná càdá-yu te tnàhá-yu cùú-yu dàtná cue téé ní sahani ñaha xì Xítóhó Jesucristú Déhe Yá Ndiõxí núú cùrúxí. Te sá dúcáⁿ ná càdá-yu te ngóo dava-gá ñáyiú cáháⁿ cuèhé-yu cuendá Xítóhó Jesucristú.⁷ Te

nchaa ñáyiú cùú-yú dàtná ñuhu, chí ñuhu-áⁿ ndi tnahá òré cúúⁿ dáú te xìhi-xi ndute, te dava ñuhu váha cùú sá xítú ñáyiú, te sá cúú núú ñuhu-áⁿ ò nàndíhi-xi, te mee Yá Ndiǒxí quidé-gă cúú sã vãha núú ñúhú-ăⁿ. ⁸ Dico núú dá ìñu na ndàa núú ñuhu-áⁿ te ñá túú vèdana nàndíhi-xi te núú ducaⁿ, te Yá Ndiǒxí vá cúú vãha iní-gá cuendá ñuhu-áⁿ sã dúcáⁿ dà ìñu ndaa núú-xi, te ìñu-áⁿ ndihi-xi cáyú. Te ducaⁿ sãtnahá-xi cùú ñáyiú dàquee tíhú tnùhu Yá Ndiǒxí chí ñá túú cùú váha iní-gá núú-yú.

Níhí-ó sã ndétú-ó ndùu táhú-ó

⁹ Te cuèi duha càháⁿ-í dico nchòhó cue ñáyiú ò cùú iní-í, chí cùtnuní ndáá iní-í sá vã cádá-ndó dàtná xiquide dava-gă ñáyiú, te mee-ni sã vãha cuu xii-ndo chí cùú-ndo ñáyiú sa ní naníhí tàhú. ¹⁰ Te ducaⁿ chí Yá Ndiǒxí cúú-gă Yaá ò váha quide ndáá, te vá dáná ndòdo iní-gá nchaa sá vãha quide-ndo, te ni vã dáná ndòdo iní-gá nàcuáa quide-ndo cuu iní-ndó-gă, te sá dúcáⁿ quide-ndo cuu iní-ndó-gă xíáⁿ chíndèe-ndo cue ñáyiú ndècu ndihi-ndo ichi Xítohó Jesucristú, te ducaⁿ-ni ta quide-ndo véxi ndéé vitna. ¹¹ Te cuiní-í sá ìñⁿ ìñⁿ-ndo nducu ndee-ndo cada-ndo nacuáa cuiní Yá Ndiǒxí dàtná tá quide-ndo véxi, te ðiu-ni ducaⁿ càda-ndo ndéé ná sáa nduu ndùu táhú-ndó cùndecu-ndo ndihi-gá núú ndécú-gă, te ducaⁿ te níhí-ndó nchàandi túhú sá ndétú-ndó ndùu táhú-ndó cùndecu ndihi-ndo ni caa ni quíhíⁿ. ¹² Te yúhú cuiní-í sá nchòhó vá tùhío-ndo càda-ndo nchaa nacuáa cuiní Yá Ndiǒxí, te cada-ndo dàtná quidé ñáyiú sàndáá iní tnúhu-gá, ñáyiú càhnu iní-xi. Te sá dúcáⁿ quidé-yú xíáⁿ nihí-yú nchaa sá ñí cachí Yá Ndiǒxí nduu táhú-yú.

13 Te cútnàhá ní xáhaⁿ Yă Ndiöxí xii ndíi Àbrahám nàcuáa cada-gá, te ní cacunehe-gá méé-gă nàcuáa cutnùníní iní ndíi sá ndàá cada-gá nàcuáa ní xáhaⁿ-gă xii ndíi, te vá yõo ìⁿ ní càcunehe-gá cuèndá sá quìndáá iní ndíi tnúhu ní cáháⁿ-gá. Te ducaⁿ nǐ quide-gá chi ìⁿdìi díi-ni mee-gă ío cùnuu-gá.

14 Te duha ní xáhaⁿ-gă xii ndíi Àbrahám: “Yòhó té Àbrahám na càchí tnúhu ndáá-í xii-n sǎ ìo chindee ñàha-í xii-n, te cáyá cuéhé víhí ñàní tnáhá-n”, duha ní xáhaⁿ-gă xii ndíi.

15 Te ndíi Àbrahám ío ní quide ndee ìní ndíi ní xíndetu ndíi, te ducaⁿ te Yá Ndiöxí ní quide-gá nàcuáa ní xáhaⁿ-gă cada-gá sá cúú-xí ndíi.

16 Te núu ìⁿ ñáyiú càháⁿ ìⁿ tnúhu ndáá cuítì te càcu nehé-yu Yá Ndiöxí cuèndá quìndáá iní tnàha ñáyiú-yu tnúhu càháⁿ-yu, te òré ducaⁿ na càháⁿ-yu te ñá túú-gă sá dácàá ñáyiú càháⁿ ndihí-yu cuèndú.

17 Te ducaⁿ nǐ quide Yá Ndiöxí ní cáháⁿ ndáá-gá sá cádá-gă nàcuáa ní cachí-gá, te ducaⁿ nǐ cáháⁿ-gá cuèndá nchaa ñáyiú ní cachí-gá nduu táhú sǎ cádá-gă nàcuáa cutnùníní iní-yu sá quidé-gă ìⁿ sá càháⁿ-gá, te ni ñà túú nàdáma-gá ìⁿ sá càháⁿ-gá.

18 Te nchoo nǐ natuha-o Yă Ndiöxí cuèndá dàcácu nihnu ñaha-gă xii-o núú ùhú núú ndàhú, te ní níhí-ó tnúhu ndee ìní ndécú ndìhi-o cuèndá sá vǎ dǎñá ndéé-ó cùndetu-o sáá nduu ndùu táhú-ó cùndecu-o ndìhi-gá. Te ducaⁿ nǐ níhí-ó tnúhu ndee ìní chi Yá Ndiöxí ní cáháⁿ ndáá-gá sá cádá-gă nàcuáa ní cachí-gá, te ñá túú dándahú ñáhá-gă, te ni ñà túú nàdáma-gá ìⁿ sá nǐ cachí-gá cada-gá.

19 Te tnúhu ndee ìní ndécú ndìhi-o xíǎ quidé-xí cùtnuníní ndáá iní-ó sǎ ndúú táhú-ó cùndecu-o ndìhi Yá Ndiöxí núú ndécú-gă, te ducaⁿ cùtnuní ndáá

ndisa iní-ó sã cuendá Xítohó Jesucrístú Yaá ndécú nũú Yã Ndiõxí. ²⁰ Te ducaⁿ ñĩ nucúndecu Xítohó Jesucrístú nũú Yã Ndiõxí cuendá ducaⁿ cànchicúⁿ nihnu-o càda-o, te ducaⁿ ñĩ nucúndecu-gá nũú Yã Ndiõxí chi cùu-gá dútú cúnùu datná ní cunuu ndíi Melquisèdec ñuyíú-a, te ducaⁿ-ni cùu-gá dútú cúnùu ni caa ni quíhíⁿ.

7

Xítohó Jesucrístú cúu-gã dútú dàtná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiu ñuú Sàlém, te ní cuu ndíi dútú ñĩ xinu cuechi ndíi nũú Dútú Ndiõxí Yaá ío cúnuu. Te ndíi Melquisèdec-áⁿ ñĩ xícáⁿ táhú ndíi nũú Yã Ndiõxí cuendá ndíi Àbrahám cútnàhá ní sáháⁿ ndíi Àbrahám-áⁿ ñĩ nàá ndíi ndíhi cue dava-gá cue téé yíndaha ñáyiu. Te cue téé-áⁿ ñã túú ní ndàcu-güedé nàá-güedé ndíhi ndíi Àbrahám-áⁿ chi ní xíta-güedé.

² Te nchaa sá ñĩ níhí ndíi Àbrahám-áⁿ nũú ñĩ nàá ndíi, te ní quide ndíi úxí xichi te ñⁿ xichi nũú ùxí-áⁿ ñĩ sáñaha ndíi xii ndíi Melquisèdec. Te dùu ndíi Melquisèdec-áⁿ quée-xí: Téé ío váha quide ndáá yíndàha ñaha xii ñáyiu, duha quèe-xi. Te ní xóo danàni ñahá-yu xii ndíi Téé yíndaha ñuú Sàlém, duha ní xóo danàni ñahá-yu. Te tnúhu Sàlém-áⁿ quée-xí: Ñuú ndécú nàhi, duha quèe-xi tnúhu-áⁿ. Núu xíãⁿ quée tucu-xi nacuaá nàni ndíi Téé yíndaha ñuú ndécú nàhi, duha quèe tucu-xi ðiu ndíi. ³ Te ñã túú tnúhu núu yoo cùu tátá ndíi ndíhi nãná ndíi, te ni ñã túú tnúhu núu yoo cùu xíi ndíi ndíhi xítná

ndïi, te ni ñà túú tnũhu núu nándi cùu ñáyiu ní cuu ñaní tnáhá ndïi ní xíndecu ndéé sanaha-gã, te ni ñà túú tnũhu núu ná ama ní cacu ndïi, te ni ñà túú tnũhu núu ná ama ní xíhí ndïi. Te ndïi-án ducaⁿ-ni ñi cuu ndïi dútú ñi xíndecu ndïi, te ducaⁿ sãtnahá-xi cùu Xítohó Jesucristú déhe Yá Ndiõxí chi cuu-gá dútú ni caa ni quíhíⁿ.

4 Te vitna chí cuãha váha cuëndá sá ndïi Melquisèdec ní cuu ndïi ìⁿ tée ío ní cuu càhnu ní xíndecu ñuyíú-a, chi ndïi Àbrahám tée ní cuu ñaní tnáhá-ó ñi xíndecu ndéé sanaha ñi guide ndïi úxí xichi nchaa sá ñi níhí ndïi núú ñi nàa ndïi. Te ìⁿ xichi núú ùxí-án ñi sãñaha ndïi xii ndïi Melquisèdec. 5 Te ndïi Moisés ní chídó tnùní ndïi nàcuáa cada nchaa dútú, cue tée ní cuu ñaní tnáhá ndïi Lèví sá cuè tée-án queheⁿ-güedé ìⁿ xichi núú ùxí xichi sá ñihí cue ñáyiu isràél ñáyiu cùu ñaní tnáhá-güedé cuu cuëndá-güedé. Te ducaⁿ quide-güedé cuèi ñaní tnáhá-güedé ndihí-yu ní cuu ndïi Àbrahám. 6 Te cuèi ñá díú ñàní tnáhá ndïi Melquisèdec cúú ndïi Àbrahám dico ní queheⁿ ndïi Melquisèdec-án ìⁿ xichi núú ùxí xichi nchaa sá ñi níhí ndïi Àbrahám. Te ndïi Melquisèdec-án ñi xicáⁿ táhú ndïi núú Yá Ndiõxí cuëndá ndïi Àbrahám. Te ñu-ni ndïi Àbrahám-án ñi xáhaⁿ Yá Ndiõxí xii ndïi sá cáda váha ñaha-gã xii ndïi. 7 Te sa cùtnuní iní-ó sá núu ìⁿ tée na cacáⁿ táhú-dé núú Yá Ndiõxí cuëndá ìⁿ ñáyiu, te tée-án cúnùu-gá-dé. 8 Te cue dútú ñáyiu isràél quéhéⁿ-güedé ìⁿ xichi núú ùxí xichi nchaa sá ñihí-yu cùu cuëndá-güedé, te cue tée-án cuú-güedé. Te núú tütú Yá Ndiõxí càchí-xi sá ndïi Melquisèdec ndécú-ní ndïi, te ducaⁿ càháⁿ-xi chi ñá túú tnũhu sá ñi xíhí ndïi. 9-10 Te sá dúcáⁿ ñi sãñaha ndïi

Àbrahám sá ñ nduu táhú ndïi Melquisèdec, te xiãⁿ cada iní-ó sã sà ndecu ndïhi ndïi Àbrahám cue ñaní tnáhá ndïi Lèví cue tée cùu dútú, cue tée quèheⁿ ìⁿ xichi núú ùxí xichi nchaa sá ñihí ñáyiú isràél cuèi vátá cácu-gã-güedé. Te cada iní-ó sã tnáhá-güedé ní sáha-güedé ndïi Melquisèdec ìⁿ xichi núú ùxí xichi nchaa sá ñ ñihí ndïi Àbrahám núú ñ nàá ndïi. Te ducaⁿ càda iní-ó chi cue tée-áⁿ cúu-güedé ñaní tnáhá ndïi Àbrahám cuèi vátá cácu-gã-güedé dàvá-áⁿ.

¹¹ Te sá cuèndá cue dútú cue tée cùu ñaní tnáhá ndïi Lèví ní ngúndecu ndïhi cue ñáyiú isràél tnúhu sá sánú ìchi ñaha xií-yu nàcuáa cadá-yu cundecú-yu. Te ñaní tnáhá ndïi Àrón cúu cuè dútú-ãⁿ. Te núu ñicó cue dútú-ãⁿ ní ndàcu-güedé cada-güedé nàcuáa cudïu ñáyiú isràél núú Yã Ndiöxí, te ñá túú-gã xíní ñuhu-xi ngúndecu ingá dútú dàtná ndïi Melquisèdec ní cùu. Te dútú-ãⁿ ñà túú ní cùu-dé dàtná ní cuu cue ñaní tnáhá ndïi Àrón. ¹² Te núú cuè dútú cue tée cùu ñaní tnáhá ndïi Lèví-áⁿ ñ ñgúndecu ingá dútú. Te sá dúcáⁿ ñ ñgúndecu ingá dútú xiãⁿ dacuitíí ñ xini ñuhu-xi sá dãma nàcuáa ndùu tnúhu sá sánú ìchi ñaha xií-yu nàcuáa cadá-yu cundecú-yu. ¹³⁻¹⁴ Te ñu-ni cuèndá dútú-ãⁿ sa ñihí-ó tnúhu, te dútú-ãⁿ cúu Xítohó Jesucristú, te ñá díú ñaní tnáhá ndïi Àrón cúu-gã chi ñaní tnáhá ndïi Jùdá cúu-gã. Te nchaa-o tà xíní ndáá-ó sã ñaní tnáhá ndïi Jùdá cúu-gã, te ndïi Moisés ñá túú tnáhí ná ní càchí ndïi cuèndá cue ñaní tnáhá ndïi Jùdá sá cúu-güedé dútú, chi ñ ñⁿ-güedé ñá túú ní cùu-güedé dútú ní cùu.

¹⁵ Te vitna cùtnuní ndáá iní-ó nàcuáa ní cuu, chi Xítohó Jesucristú cúu-gã ingá dútú dàtná ní cuu

ndíi Melquisèdec. ¹⁶ Te ñá díú cuendá tnúhu sá sánú ìchi ñaha xii ñáyiú nàcuáa cadá-yu cundecú-yu ducaⁿ ni cùu-gá dútú, chi ní cuu-gá dútú cuendá sá cúú-gă Yaá cundecu ni caa ni quíhíⁿ chi vá ííⁿ ndùu te ndìhi nihnu-gá. ¹⁷ Te duha ní xáhaⁿ Yă Ndiöxí xii-gá:

Yòhó cúú-n dütú dàtná ní cuu ndíi Melquisèdec,

te cundecu-n nchaa nduu nchaa quíú.

Duha ní xáhaⁿ Yă Ndiöxí xii-gá. ¹⁸ Te xíăⁿ nŭu nchaa tnúhu ndéé díhna, tnúhu sá ñí xíndecu ndìhi cue dútú ñà túú-gă cúnùu-xi vitna chi ñá túú-gă xíní ñùhu-xi te ni ñà túú ñă chíndèe ñaha-xi. ¹⁹ Te ñiú-ni tnúhu-áⁿ cúú-xí tnùhu sá ñí chídó tnùní ndíi Moisés canu ichi ñaha xii ñáyiú nàcuáa cadá-yu cundecú-yu. Te tnúhu-áⁿ ñà túú vèdana ni quide-xi nacuáa chindee-xi ñáyiú cudíú-yu núú Yă Ndiöxí. Dico vitna ní ngúndecu ndìhi-o tnùhu ndee ìní sá ïo-gá váha dàcúúxí tnùhu ndéé díhna, chi ndècu ndìhi-o Xítóhó Jesucrístú Yaá cúú dütú-ó. Te Yaá-áⁿ quídé-gă tnàhá tnúhu-o ndìhi Yá Ndiöxí vitna.

²⁰ Te Yá Ndiöxí ní cáháⁿ ndáá cuítì-gá sá Xítóhó Jesucrístú cuu-gá dútú. ²¹ Dico ñá túú dùcaⁿ ní cáháⁿ-gá cuendá cue ñaní tnàhá ndíi Lèví cue téé ní cuu dútú, cuèi mei òré ní chisaha-güedě ní cuu-güedé dútú. Te cútnàhá ní chisaha Xítóhó Jesucrístú cúú-gă dútú, te Yá Ndiöxí ní xáhaⁿ ndáá cuítì-gá xii-gá, te duha ní xáhaⁿ-gă:

Yúhú Dútú Ndiöxí càháⁿ ndáá cuítì-í te vá dàmà-í tnúhu càháⁿ-í:

“Yòhó cúú-n dütú dàtná ndíi Melquisèdec,

te cundecu-n ñí caa ni quíhíⁿ.”

Duha ní xáhaⁿ Yă Ndiöxí xii Xítóhó Jesucristú. ²² Te Xítóhó Jesucristú quidé-gă nàcuáa cutnùní ndáá iní-ó să Yă Ndiöxí cada-gá ingá núú să văha sá cúú-xí-ó dàtná ní cachí-gá, te xíăⁿ cúú-xí să ïo-gá văha dàcúúxí tnũhu ní cáháⁿ-gá ndéé díhna. ²³ Te ío cuéhé cue ñaní tnáhá ndií Lèví ní cuu-güedé dútú, te ducaⁿ cuendá sá ñà túú ní cùdí-güedé cundecu-güedé chi ní ndií-güedé ní xíhí. ²⁴ Dico Xítóhó Jesucristú chi vá cùú-gá, chi cundecu-gá ni caa ni quíhíⁿ nũu xíăⁿ diu-ni-gá cuu-gá dútú, te vá yõo ïⁿ-gá cuu dútú cada núú-gă. ²⁵ Te núu xíăⁿ Xítóhó Jesucristú dácăcu nihnu ñaha-gă xii nchoo ñăyiu núú ùhú núú ndàhú, nchoo ñăyiu sàndáá iní ñáhá xì-gá, te diu-ni nchoo cùu-o ñăyiu tnáhá tnúhu ndií Yă Ndiöxí, te vá ïⁿ ndùu-gá te cuíta nihnu-o. Te ducaⁿ chi Xítóhó Jesucristú ñá túú xòcuíñí-gá núú Yă Ndiöxí càháⁿ ndàhú-gá cuendá-ó.

²⁶ Te Xítóhó Jesucristú cúú-gă Yaá cúú dütú cúnùu xini ñuhu-o cundecu ndií-o, te diu-gá cúú-gă Yaá chíndèe chitúu ñaha xii-o, te cùu-gá Yaá ío quide ndáá núú Yă Ndiöxí, te cùu-gá Yaá cándòo canine chi ñá túú tnàhí cuéchi-gá. Te ñá túú tnàhí quide-gá dàtná quidé nchàa cue ñăyiu ndècu ichi cuehé ichi duha, te cùu-gá Yaá ní nucúndecu andiú nũú ndécú Yă Ndiöxí te yàcáⁿ táxí tnùní-gá. ²⁷ Te ñá túú quide-gá dàtná ní quide cue dútú ní cunuu ní xíndecu, chi cue dútú-ăⁿ ïⁿ nduu ïⁿ nduu ní xóo cahni-güedé quíti ní xóo nduu táhú Yă Ndiöxí, te díhna-gá cuendá nchaa cuéchi mee-güedé ducaⁿ ní xóo cada-güedé te dàtnùní ducaⁿ ní xóo cada tucu-güedé cuendá nchaa cuéchi ñăyiu. Dico Xítóhó

Jesucrìstú chi ìⁿ xito-ni ní xíhí-gá sá cúú-xí nchàa ñáyiú chi ducaⁿ ñí sani iní-gá, te vá íⁿ ndùu-gá ducaⁿ càda tucu-gá. ²⁸ Te sá cuendá nchaa tnúhu ní chídó tnùnì ndí Moisés xiáⁿ ní xíndecu cue téé ní cuu dútú cúnùu, te cue téé-áⁿ ñí cuu-güedé cue téé yíca cuěchi-xi. Te sátá dúcáⁿ ñí chídó tnùnì ndí Moisés nàcuáa cada ñáyiú, te ní xica cuéhé víhí ndùu te dătnùnì ní cáháⁿ ndáá cuítì Yá Ndiöxí sá Dêhe-gá cuu-gá dútú cúnùu. Te Yaá cúú Dêhe-gá-áⁿ ñí quide-gá nchaa nàcuáa tàú-xi cunduu, te ñiú-ni ducaⁿ càda-gá ni caa ni quíhíⁿ.

8

Xítóhó Jesucrìstú cúú-gă dútú cúnùu

¹ Te Xítóhó Jesucrìstú Yaá cúú dútú cúnùu ndecu ndíhi-o cuándaa-gá andiú, te ní ngóo-gá xio cùha Dútú Ndiöxí Yaá ío cúnuu, te tnàhá-gá cúnùu-gá. Te ñiú cuendá-a cùu-xi sá ño-gá cúnùu ta cáháⁿ-ndí véxi. ² Te núú ndécú Yă Ndiöxí cúú-xí nŭú ñí víhí. Te cada iní-ó să cúú-xí ìⁿ vehe te xiáⁿ ndécú Xítóhó Jesucrìstú cúú-gă dútú, te vehe-áⁿ ñí dácáá mèe Yá Ndiöxí te ñá ñíú cuè téé ñuyíú-a. ³ Te sá cuendá nchaa tnúhu ní chídó tnùnì ndí Moisés xiáⁿ ní xíndecu cue dútú cúnùu cuendá sá cáhni-güedé quítì nduu táhú Yă Ndiöxí, te nacani cuendá-güedé núú-gă nchaa dava-gá sá ñihí-güedé nduu táhú-gă. Te xiáⁿ nŭu dai ní xini ñuhu-xi sá tnàhá Xítóhó Jesucrìstú cuáñaha-gă ìⁿ sá ndúú táhú Yă Ndiöxí, te táhú-ăⁿ cúú-xí mèe-gá chi ní xíhí-gá ní cuu-gá dătná ìⁿ táhú să cúú-xí Yă Ndiöxí. ⁴ Te núu ni xíndecu-ni Xítóhó Jesucrìstú ñuyíú-a te vá cúú-gă dútú ní cùu, chi sa ndècu cue dútú sãñaha nchàa sá ndúú táhú Yă Ndiöxí dătná càháⁿ nchaa tnúhu

ní chídó tnùní ndíi Moisés. ⁵ Te nchaa sá quidé cuè dútú ñǎyiu isràél nǔtnahá-xi luha nchaa sá quidé Xítóhó Jesucrístú Yaá cúú dǔtú cúnùu ndecu andiù. Te quèe ndáá-xi nàcuáa ní xáhaⁿ Yá Ndiǒxí xii ndíi Moisés cútnàhá tá cùyatni ngúíta ndíi dacàa ndíi vehe-gá, te duha ní xáhaⁿ-gǎ: “Ío váha cada cuèndá-n nàcuáa daçàa-n vehe-í dàtná cáá sǎ ní dánèhé ñáhà-í xii-n xití yucu”, duha ní xáhaⁿ-gǎ xii ndíi. ⁶ Dico vitna chi Xítóhó Jesucrístú cúú-gǎ dútú cúnùu, te ío-gá càhnu nduu chiuⁿ quide-gá dàcúúxí cuè dútú cue ñáyiu isràél. Te diu Xítóhó Jesucrístú cúú-gǎ Yaá quidé tnàhá tnúhu-o ndíhi Yá Ndiǒxí, te ducaⁿ chi Yá Ndiǒxí ío-gá váha ndùu tnúhu ní cáháⁿ-gá xito cùu uú dàcúúxí tnúhu ní cáháⁿ-gá ndéé díhna, te ducaⁿ ío váha ndùu tnúhu ní cáháⁿ-gá xito cùu uú chi ní cachí-gá sá ìngá núú sǎ ío-gá váha cada ñaha-gǎ xii-o vitna.

⁷ Te núu nàcuáa ní cachí Yá Ndiǒxí cada ñaha-gǎ xii-o ndéé díhna ni quide-xi nchaa nacuáa tàú-xi cunduù nàcuáa nduu táhú-ó cùndecu váha-o nǔú-gǎ ñá, te ñá túú xìni ñuhu-xi cáháⁿ tucu-gá sá cádá-gǎ ìngá núú sǎ vǎha sá cúú-xí-ó vitna ni cuu. ⁸ Te Yá Ndiǒxí ñá túú ní cùu váha iní-gá núú ñáyiu isràél nùu xíáⁿ ní cáháⁿ-gá cuèndá-yu, te duha ní cachí-gá:

Yúhú cúú-í Dútú Ndiǒxí, te duha ndùu tnúhu na cáháⁿ-í: Sáa nduu te cada-í ìngá núú sǎ vǎha sá cúú-xí cuè ñaní tnáhá ñáyiu isràél, ndíhi cue ñaní tnáhá ndíi Jùdá diu-ni ñáyiu isràél.

⁹ Te tnúhu sá cáháⁿ-í-a ñá túú ìⁿ-ni cuu-xi ndíhi tnúhu sá ní xáhaⁿ-í xii cue ñáyiu ní cuu ñaní tnáhá-yu ní xíndecu ndéé sanaha càda-í-yu,

te diu-ni dává-án ñi quide yica-ĩ ní ndeñuhu-í-yu
nacióⁿ Ègíptú,

te ñá túú ní cuíní-yu tñí-yu tnúhu ní xáhaⁿ-ĩ xíí-yu
cuendá ducaⁿ càda váha-í-yu,

te xíãⁿ nõu ní dáñá nihnu-í-yu ñá túú-gã ní quide
cuendá-í-yu.

¹⁰ Te na sàá nduu te duha ndùu tucu ìngá núú sã
váha cada-í cue ñáiyu isràél.

Te yúhú cada-í nàcuáa cutnùní váha iní-yu nàcuáa
cuíní-í cadá-yu,

te ducaⁿ ñi yuhu ñi iní-yu cadá-yu.

Te yúhú Yã Ndiõxí quindaha-ĩ-yu,

te mèé-yu cuú-yu ñáiyu cùu cuendá-í.

¹¹ Te dává-án chi ñi ñáiyu cùu ndi meé-yu,

te ñi cuè dava-gá ñáiyu vá cùtnùhu tnàhá-yu sã
nátùha ñahá-yu xii-í,

chi dává-án nchaa ñáiyu cundecu ndihí ñahá-yu
xii-í,

cuèi ñáiyu cùnuu te cuèi ñáiyu ñá túú cùnuu.

¹² Te dává-án cada càhnu iní-í nchaa sã cuèhé sã
dúhá quidé-yu,

te vá ìíⁿ ndùu-gá ndacu iní-í nchaa sã quidè-yu.

Duha ní cachí Yã Ndiõxí cuendá ñáiyu isràél. ¹³ Te

sã dúcáⁿ ñi cáháⁿ Yã Ndiõxí sã cadá-gã ìngá núú
sã váha sã cúú-xí ñáiyu xíãⁿ cùtnùní sã tnùhu sã

ñi cáháⁿ-gá díhna ñá túú-gã xíní ñùhu-xi. Te cada

iní-ó sã tnùhu-án cúú-xí ìíⁿ sã ñi cunaha ndècu te ñá

túú-gã nándihí-xi te cuíta-ná-xi, ducaⁿ sãtnahá-xi

cùu tnúhu sã ñi cáháⁿ-gá ndéé díhna.

9

Cuendá vehe Yá Ndiõxí

¹ Te tnúhu sá nǐ cáháⁿ Yă Ndiöxí ndéé díhna cùu-xi cuendá nàcuáa cada ñáyiu isràél chiñuhu ñàhá-yu xii-gá, ndìhi cuendá vehe-gá caa ñuyíú-a. ² Te ñáyiu isràél ní dácáá-yu vehe Yá Ndiöxí, te vehe-áⁿ nǐ cuu-xi vehe dóó te ní xúhuⁿ nehu xítí-xi. Te cuártú díhna ní xínani-xi cuártú ní cuu íí, te xíaⁿ nǐ xíndecu ñⁿ sá ndéé dité-xi sá nǐ cándodó ñⁿ caa candíl núú dité-xi, te ní xínutnñⁿ ñⁿ mèsá ní xóo códó pàá ní xóo nduu táhú Yă Ndiöxí. ³ Te cuártú cúú úú ní xínani-xi cuártú ní cuu íí víhí-gă. ⁴ Te xítí cuártú-áⁿ nǐ xínutnñⁿ ñⁿ sá nǐ cuáha mee-ni dǐhúⁿ cuàáⁿ te núú xǐáⁿ ní xóo cahmi-güedé dúsa sá sàháⁿ tnámí. Te dǐu-ni xíaⁿ nǐ xíndecu tucu ñⁿ cǎjá ní cuu mee-ni dǐhúⁿ cuàáⁿ te xítí cǎjá-áⁿ nǐ xúhuⁿ ñⁿ lítu ní cuáha mee-ni dǐhúⁿ cuàáⁿ, te xítí lítu-áⁿ nǐ xúhuⁿ mànáá sá nǐ xóo caxí-yu dává-áⁿ. Te dǐu-ni xítí cǎjá-áⁿ nǐ xúhuⁿ tnudì ndíi Àrón sá nǐ saa itá-xi, ndìhi yúú sǎ nǐ xíndeé tnúhu ní cáháⁿ Yă Ndiöxí nàcuáa cada ñáyiu. Te duha ní xínani cǎjá-áⁿ: Cǎjá sá ñúhú tnúhu ní cáháⁿ Yă Ndiöxí sá cúú-xí ñáyiu, duha ní xínani-xi. ⁵ Te núú cǎjá-áⁿ nǐ cándodó úú tnàhá sá nǐ cadúha-yu, te xíaⁿ cáá-xí dàtná cáá espíritú xínú cuèchi núú Yă Ndiöxí. Te cuendá úú xǐáⁿ ní cutnùnì iní-yu sá ïo cǎhnu cuu Yá Ndiöxí, te sá nǐ cadúha-yu-áⁿ ndéé ndíxíⁿ-xi, te ndíxíⁿ-xi-áⁿ dǎhu-xi xio xio núú quidé cǎhnu iní Yă Ndiöxí nchaa yíca cuèchi ñáyiu, dico vá cúú-gă cáháⁿ-í cuendá nchaa dava-gá xǐáⁿ vitna.

⁶ Te nchaa xǐáⁿ ní xíndecu xítí vehe Yá Ndiöxí, te cue dútú nǐ xóo quíhu-güedé ñⁿ nduu ñⁿ nduu xítí cuártú díhna ní xóo cada-güedé nàcuáa tàú-güedé cada-güedé sá cúú-xí Yă Ndiöxí. ⁷ Te cuártú cúú

ùú-áⁿ chi mee-ni dütú cúnùu ní xóo quíhu-dé ìⁿ
 xito-ni ndì tnahá cuía. Te ndì tnahá òré ducaⁿ
 nĩ xóo quíhu dütú cúnùu-áⁿ te ní xóo canehe-dé
 níñĩ nĩ xóo quíhu ní xóo nduu táhú Yă Ndiöxí. Te
 ducaⁿ nĩ xóo cada dütú-ăⁿ cuëndá sá Yă Ndiöxí
 cada càhnu iní-gá nchaa yíca cuëchi mee-dě, ndihì
 nchaa yíca cuëchi ñáyiu. ⁸ Te sá dúcáⁿ mèe-ni dütú
 cúnùu ní xóo quíhu-dé xítí cuártú ní cuu í-gă-áⁿ,
 xiăⁿ Espíritú Yă Ndiöxí quídé-xí cùtnuní iní-ó sã ñini
 ducaⁿ ní xíndecu vehe-áⁿ nĩ xóo cadá-yu nàcuáa ní
 xóo cúñaha Yă Ndiöxí cadá-yu. Te xiăⁿ cùtnuní sá
 vătă sàá-gá nduu cãháⁿ ndihì-yu Yă Ndiöxí nàcuáa
 tàú-xi cunduu. ⁹ Te sá dúcáⁿ nĩ xíndecu vehe-áⁿ,
 ndihì sá dúcáⁿ nĩ xóo cada nchaa cue dütú-ăⁿ, xiăⁿ
 cùtnuní iní-ó nàcuáa quide Yă Ndiöxí vitna, chi
 nchaa quití ní xóo cahni cue dütú-ăⁿ nĩ xóo nduu
 táhú Yă Ndiöxí, ndihì nchaa dava-gá sá ní xóo nduu
 táhú-gă ñá túú ní quide-xi nacuáa nduu ndoo nduu
 nine iní cue ñáyiu nàcuáa cutnùní iní-yu sá ñà
 túú-gă cuëchi-yu ndècu núú Yă Ndiöxí. ¹⁰ Te sá
 dúcáⁿ nĩ xóo cada nchaa dütú-ăⁿ nĩ níhí tnahá-xí
 ndihì nchaa tnúhu sá dánèhé ñáhá xì ñáyiu ná
 cúú sã cáxì-yu ndihì ná cúú sã cúú còhó-yu ndihì
 nàcuáa ndàhá-yu. Te tnúhu-áⁿ nĩ cuu-xi mee-ni
 sã nĩ sanu ichi ñaha xì-yu nàcuáa cundecú-yu
 ñuyíú-a. Te tnúhu-áⁿ nĩ nándihì-xi ndéé ní sáa
 nduu nĩ nadama Yă Ndiöxí tnúhu-áⁿ cuëndá sá vă
 dúcáⁿ-gă cadá-yu cundecú-yu.

¹¹ Te Xítohó Jesucrístú ní quixi-gá ñuyíú-a, te
 ḍu-gá cúú-gă Yaá cúú dütú cúnùu, te xiăⁿ nũu
 quide-gá nchaa sá văha sá cúú-xí-ó. Te vitna
 ní nucúndecu-gá núú ïo vii ío váha càa, te núú

ndécú-gă-áⁿ ñà túú cùu-xi ìⁿ vehe sá ñí dácáá cuè téé ñuyúú-a. ¹² Te cada iní-ó sǎ Xítóhó Jesucristú cuánguihu-gá xítí cuàrtú núú ñí cuu íí víhí dàtná ní xóo cada dútú cúnùu ní xíndecu ndéé sanaha, chi ní nucúndecu-gá núú ndécú Yǎ Ndiǒxí. Dico ñá túú ní quide-gá dàtná ní xóo cada dútú cúnùu ní xíndecu ndéé sanaha, chi dútú-ǎⁿ òré ní xóo quíhu-dé xítí cuàrtú ní cuu íí-gă-áⁿ, te ní xóo canehe-dé níñí chívá ndihí níñí chěhlu ní xóo quíhu. Dico Xítóhó Jesucristú chi níñí méé-gă ní sati ní xihí-gá núú cùrúxí, te xǎⁿ duuⁿ duuⁿ cuáháⁿ-gá ní nucúndecu-gá núú ndécú Yǎ Ndiǒxí. Te sá dúcáⁿ ñí quide-gá xǎⁿ ní naníhí tàhú-ó. ¹³ Te nchaa ñáyiu ní xóo cada nàcuáa vá cúú-gă-yu ñáyiu ní cuu íí, ñáyiu-áⁿ ñí xóo códó ñáhá cuè dútú níñí ndicutu, ndihí níñí chívá, ndihí yáá cùñú chěhlu quítí sàhni-güedé cuèndá nduu íí tucú-yu. ¹⁴ ¡Dico níñí Xítóhó Jesucristú chi ío-gá nándǎhi-xi sá cúú-xí nchòo ñáyiu xíndecu vitna! Te cuèndá níñí-gă-áⁿ, chi Espiritú Yǎ Ndiǒxí sá ndécú nchaa nduu nchaa quíú ñí cuu ìⁿnuu-xi ndihí Xítóhó Jesucristú sá cúú cúú-gá cuèndá cuu-gá dàtná ìⁿ táhú sǎ cúú-xí Yǎ Ndiǒxí cuèi cùu-gá Yaá ñá túú tnàhí cuéchi-xi, te ní sati níñí-gă te ní xihí-gá. Te cuèndá xǎⁿ ní cutnùní iní-ó sǎ Yǎ Ndiǒxí ní quide càhnu iní-gá nchaa sá ñà túú vǎha ní quide-o, te ní nduu ndoo ní nduu nine iní-ó. Te ducaⁿ ñí nduu ndoo ní nduu nine iní-ó cuèndá sá ndácú-ó cùnu cuechi-o núú Yǎ Ndiǒxí Yaá ndécú nchaa nduu nchaa quíú.

¹⁵ Te Xítóhó Jesucristú ní quide ndáá-gá núú Yǎ Ndiǒxí cuèndá cue ñáyiu ndècu ñuyúú-a. Te cuèndá xǎⁿ Yǎ Ndiǒxí cada-gá ingá núú sǎ vǎha

sá cúú-xí-yu dàtná ní cachí-gá, te ducaⁿ càda-gá sá cuèndá nchaa ñáyiu ní cáháⁿ-gá cundecu ndihí-gá, chi ñáyiu-áⁿ nduu táhũ-yu cundecu ndihí váha ñàhá-yu xii-gá ni caa ni quíhíⁿ chi ducaⁿ ñí cachí-gá, te ducaⁿ chi Xítóhó Jesucristú ní xihí-gá núú cùrúxí cuèndá sá Yă Ndiõxí cada càhnu iní-gá nchaa yíca cuèchi-yu, nchaa cuéchi sá ñí quidé-yu cútnàhá ní cunuu tnúhu sá ñí cáháⁿ-gá díhna. ¹⁶ Te nchoo xíní-ó sã nõu ìⁿ téé na càdúha ìⁿ tutú nàcuáa cada ñáyiu dàcáhñu-yu nchaa sá ndécú ndihí-dé, te tutú-áⁿ xíní ñùhu-xi ndéé ná yăha nduu cùú-dé. ¹⁷ Te ñá túú tàú-xi cada ñáyiu nàcuáa càháⁿ-xi núú tütú-áⁿ ñini ndècu téé ní cadúha, dico sátá ná yăha cuú-dé te cadá-yu nàcuáa càháⁿ-xi. ¹⁸ Te cuèi tnúhu ní cáháⁿ Yă Ndiõxí ndéé díhna nàcuáa cada váha-gá ñáyiu, te ñiu-ni ndihí ñíñí ñí cundáá-xi chi ní sahní-güedé quiti te ní satí ñíñí-güedi. ¹⁹ Te ndíi Moisés ní cáháⁿ ndodo ndíi núú nchaa ñáyiu nàcuáa ní cachí Yă Ndiõxí cadá-yu, te nàcuáa-ni ndùu tnúhu ní chídó tnùní ndíi núú tütú ndíi ní cáháⁿ ndíi, te ní dácá ndíi ndute ñíñí chěhlu ndihí ñíñí chivá lĩhli, te ní queheⁿ ndíi ìⁿ dité yutnu nàni hisópó ndihí luha idi ticuèhé, te ní chindóyo ndíi ñíñí-ãⁿ. Te ní sódó ndíi núú tütú ndéé tnúhu Yă Ndiõxí sá ñí chídó tnùní ndíi-áⁿ, te tnàhá cue ñáyiu xĩndecu-áⁿ ñí chúcú ndíi. ²⁰ Te ní xáhaⁿ ndíi Moisés xií-yu: “Cuèndá ñíñí-a ní cundáá sá Yă Ndiõxí cada ñaha-gă xii-ndo sã văha chi ducaⁿ ñí cachí-gá cada-gá sá cúú-xí-ndó”, duha ní xáhaⁿ ndíi xií-yu. ²¹ Te ñiu-ni ducaⁿ ñí quide tucu ndíi ní chúcú ndíi ñíñí vehe-gá ndihí nchaa sá nándihí-güedé òré chíñùhu-güedé Yă Ndiõxí ndécú

xítí vehe-gá-án. ²² Te tnúhu ní chídó tnùní ndíi Moisés cächí-xi sá méé-ní nǎí chucu-güedě nchaa sá cǎnehe chìuⁿ-güedé òré chíñùhu-güedé Yǎ Ndiöxí, te sacú-nǎ te ndíhi ndoo nchaa xǎⁿ chucu-güedě níñí ni cùu. Te dacuítí ní xini ñuhu-xi sǎ cǎtí nǎí cuendá ducaⁿ càda cahnu iní Yǎ Ndiöxí nchaa yíca cuěchi ñáyi.

Xítóhó Jesucrístú ní xíhí-gá núú cùrúxí cuendá sá vǎ cùndecu-gá cuéchi-o núú Yǎ Ndiöxí

²³ Te sá cuendá sá nǎ xíhí Xítóhó Jesucrístú núú cùrúxí, xǎⁿ ñǎ túú-gǎ cuéchi-o ndecu núú Yǎ Ndiöxí. Te cuendá nchaa sá nǎ xíhi xítí vehe-gá sá nǎ dǎcǎá ñǎyi isràél xǎⁿ cùtnùní iní-ó nàcuáa quide-xi núú ndécú-gǎ. Te dacuítí ní xini ñuhu-xi sǎ cǎhni-güedě cue quítí ní cachí Yǎ Ndiöxí cuendá nduu íi nchaa sá nǎ xíhi xítí vehe-gá-án. Te cuěi ducaⁿ nǎ sahani-güedé cue quítí-án dico ñǎ túú ní quide-xi nacuáa ngúndecu váha-o núú Yǎ Ndiöxí. Dico Xítóhó Jesucrístú ní xíhí-gá, te sá nǎ xíhí-gá xǎⁿ ní quide-gá nàcuáa ngúndecu váha-o núú Yǎ Ndiöxí. ²⁴ Te Xítóhó Jesucrístú cuándaa-gá andíu núú ndécú Yǎ Ndiöxí cǎháⁿ ndàhú-gá cuendá-ó, te Xítóhó Jesucrístú chi ñǎ díú ìⁿ vehe ní dǎcǎá cuè téé ñuyíú-a cuánguihu-gá. Te vehe Yǎ Ndiöxí sá nǎ dǎcǎá cuè ñáyi isràél ñuyíú-a ndéé sanaha, ndíhi nchaa nàcuáa ní xóo cada-güedé xítí vehe-gá-án xǎⁿ cùtnùní iní-ó nàcuáa quide-xi núú ndécú-gǎ. ²⁵ Te dútú cùnùu núú ñáyi isràél ní xóo quíhu-dé núú cuíá núú cuíá xítí cuàrtú ní cuu íi víhí-gǎ-án, te ní xóo canehe-dé níñí ní xóo quíhu xítí cuàrtú-án dico ñǎ díú nǎí méé-dě. Dico Xítóhó Jesucrístú

chi ñá túú dùcaⁿ ni quide-gá chi #ⁿ xito-ni ní sati níñí-gã te ní xíhí-gá. ²⁶ Chi núu ni xíhí-gá nuu núu te ndéé cútnàhá ní ngáva ñuyíú ducaⁿ ngüita-gá cada-gá ní cùu, te vitna ta ndíhi nduu cuáháⁿ ní quixi-gá ñuyíú-a ní xíhí-gá #ⁿ xito-ni cuendá cuu-gá dàtná #ⁿ táhú sã cúú-xí Yã Ndiöxí, te ducaⁿ ñi quide-gá cuendá sá vã cündècu-gá cuéchi ñáyiu núú Yã Ndiöxí. ²⁷ Te nchoo cuè ñáyiu ñuyíú-a chi #ⁿ xito-ni cuú-ó te dàtnùní ducaⁿ te cada ndáá Yã Ndiöxí cuéchi-o. ²⁸ Te ducaⁿ sãtnahá-xi cùu Xítohó Jesucristú chi #ⁿ xito-ni ní xíhí-gá cuendá sá vã cündècu-gá cuéchi ñáyiu núú Yã Ndiöxí, te ducaⁿ ñi cuu ní xíhí-gá chi mee-gã ducaⁿ ñi cachí-gá cunduu. Te quixi tucu Xítohó Jesucristú ñuyíú-a dico ñá díú-gã sá cáda-gã cuendá sá vã cündècu-gá cuéchi ñáyiu núú Yã Ndiöxí, chi quixi-gá nacua-gá nchaa ñáyiu ndètu ñaha xii-gá cuendá cundecú-yu ndíhi-gá ni caa ni quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyiu israél cadá-yu, nchaa tnúhu-áⁿ ñi quide-xi ní cutnùní luha iní-yu nàcuáa cada Yá Ndiöxí cada váha ñaha-gã xii-o vitna. Dico ñá díú mèi nacuaa ní xáhaⁿ ndíi Moisés xii ñáyiu quide Yá Ndiöxí vitna chi dãma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuaa cundáa nchaa ñáyiu túha ñaha xii Yá Ndiöxí cuéi ní xóo cahni-güedé quiti ní xóo nduu táhú-gã núú cuiá núú cuiá. ² Te núu dicó sá ñi xóo cahni-güedé quiti ní xóo nduu táhú Yã Ndiöxí ní quide-xi nacuaa nduu ndoo nduu nine iní cue ñáyiu, te vá

cáhní-gă-güedé cue quití-áⁿ nduu táhú-gă ní cùu, te ducaⁿ te cutnùní iní-yu sá ñà túú-gă cuéchi-yu ndècu núú Yă Ndiöxí ní cùu. ³ Te sá dúcáⁿ ñí xóo cahni-güedé quití ní xóo nduu táhú Yă Ndiöxí núú cuiá núú cuiá, xiáⁿ ní xóo ndacu iní cue ñáyíu nchaa sá cuéhé sá dúhá ñí xóo cada-yu. ⁴ Te ducaⁿ chi níñí ndicutu-áⁿ ndihí níñí chivá-áⁿ ñà túú ní xóo ndacu-xi cada-xi nàcuáa vá cündècu cuéchi-yu núú Yă Ndiöxí.

⁵ Te xiáⁿ núu cútnàhá ní quexìo Xítóhó Jesucristú ñuyíú-a ní xáhaⁿ-gă xii Yá Ndiöxí:

Yòhó Tătà-í, ñá túú ndùu vétú váha iní-n sã sáhní-güedé quití ndùu táhú-n,

te ni ñã túú ndùu vétú váha tucu iní-n cuendá nchaa dava-gá sá táxí-güedé ndúú táhú-n,

núu xiáⁿ ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

⁶ Te ni ñà túú ndùu vétú váha iní-n cuendá quití sàhmi-güedé ndúú táhú-n te ni ñã túú ndùu vétú váha iní-n cuendá nchaa dava-gá sá táxí-güedé ndúú táhú-n cuendá sá vã cündècu-gá cuéchi ñáyíu núú-n.

⁷ Núu xiáⁿ yúhú ní cachí-í xii yòhó Tătà-í Dútú Ndiöxí sá yúhú véxi-í ñuyíú-a cada-í nchaa sá cuení-n cada-í dàtná yódó tnùní cuendá-í núu tütú-n.

Duha ní xáhaⁿ Xítóhó Jesucristú xii Tătá-gă Dútú Ndiöxí. ⁸ Te Xítóhó Jesucristú díhna-gá ní xii-gá Yă Ndiöxí Yaá cúú Tătá-gă: “Yòhó Tătà-í ñã túú ndùu vétú váha iní-n cuendá quití sàhmi-güedé ndúú táhú-n, ndihí cuendá quití sàhmi-güedé ndúú táhú tucu-n cuendá sá vã cündècu-gá cuéchi ñáyíu núú-n, ndihí cuendá nchaa dava-gá táhú

sã táxí-güedě xii-n ñà túú ndùu vétú váha iní-n cuendá nchaa xiǎⁿ”, duha ní xáhaⁿ Xítóhó Jesucristú xii Tǎtá-gǎ Dútú Ndiǒxí. Te ducaⁿ ñí xáhaⁿ-gǎ cuěi núú tütú ndíi Moisés yódó tnùní sá dúcáⁿ càda-güedé. ⁹ Te sátá dúcáⁿ te ní xáhaⁿ tùcu-gá xii Tǎtá-gǎ Dútú Ndiǒxí: “Yòhó Tǎtà-í Dútú Ndiǒxí, mee-í véxi-í ñuyíú-a cuendá cada-í nchaa nàcuáa cuíní-n”, duha ní xáhaⁿ-gǎ xii Tǎtá-gǎ. Te sá dúcáⁿ ñí cáháⁿ Xítóhó Jesucristú xiǎⁿ ní cutnùní sá ñà túú-gǎ xíní ñùhu-xi ducaⁿ cada-güedé cahni-güedé nchaa quití-áⁿ, te ducaⁿ chi mee Xítóhó Jesucristú ní xíhí-gá ní cuu-gá dàtná ìⁿ táhú sǎ cúú-xí Yǎ Ndiǒxí, te ducaⁿ ñí cuu chi ducaⁿ tnàhí ní cachí Yǎ Ndiǒxí cunduu. ¹⁰ Te Xítóhó Jesucristú ní quide-gá nàcuáa ní cuíní Yǎ Ndiǒxí cada-gá, chi ní xíhí-gá núú cùrúxí chi ducaⁿ ñí cuíní méé-gǎ cunduu, te ìⁿ xito-ni ní xíhí-gá sá cuendá nchaa ñáyíu, te cuendá xiǎⁿ nùu ndècu yiñuhu-o núú-gǎ vitna.

¹¹ Te cue dútú ñáyíu isràél chi ìⁿ nduu ìⁿ nduu ní xóo cahni-güedé quití ní xóo nduu táhú-gǎ, te ñà túú ní dàma-güedé nàcuáa ní xóo cada-güedé. Te nchaa sá ñí xóo cada-güedé-áⁿ ñà túú ní quide-xi nacuáa vá cùndècu-gá cuéchi ñáyíu núú Yǎ Ndiǒxí. ¹² Dico Xítóhó Jesucristú ní cachí-gá sá cúú cùú-gá, te ní xíhí-gá núú cùrúxí cuendá nchaa yíca cuèchi nchaa nchoo ñáyíu ndècu ñuyíú-a. Te sátá dúcáⁿ te dàtnùní ní ngóo-gá xio cùha Dútú Ndiǒxí táxí tnùní-gá, te vá ìⁿ ndùu ìⁿ quíú-gǎ te cuú-gá. ¹³ Te ñíu-ni xiǎⁿ cundecu-gá cundetu-gá ndéé sáá nduu cànehe nchaa sá cúú ùhú iní ñáhá xì-gá sá yíñuhu núú-gǎ. ¹⁴ Te cuendá sá ñí xíhí Xítóhó Jesucristú ìⁿ xito-ni xiǎⁿ ní cuu-gá dàtná ìⁿ táhú sǎ cúú-xí

Yă Ndiöxí, xiăⁿ ní quide-xi sá ncháá ñăyiu cùu cuendá-gá ñá túú-gă ná cumánĭ-yu núú-gă ni caa ni quíhĭⁿ. ¹⁵ Te mee Espíritú Yă Ndiöxí càháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

¹⁶ Sáá nduu te cada-í nchaa ñăyiu nàcuáa na càháⁿ-í-a,

te cada-í nàcuáa cutnùní iní-yu tnúhu sá dánèhé-í-yu tnúhu sá cánùichi ñaha xií-yu nàcuáa cadá-yu cundecú-yu,

te cada tucu-í sá tnĭⁿ-yu nchaa tnúhu-áⁿ.

Duha ní cachí-gá. ¹⁷ Te ní cachí tucu-gá:

Te vá ĩⁿ ndùu ĩⁿ quíú-gă ndacu iní-í sá quidé sàá iní-yu tnúhu-í,

te ni vă ĩⁿ ndùu ĩⁿ quíú-gă te ndacu iní-í nchaa sá cuèhé sá dúhá quidé-yu.

Duha ní cáháⁿ Yă Ndiöxí càchí Espíritú-gá. ¹⁸ Te sá dúcáⁿ quide cahnu iní Yă Ndiöxí nchaa cuéchi-o, núu xíăⁿ ñá túú-gă xíní ñùhu-xi cuú quiti nduu táhú-gă cuendá nchaa sá cuèhé sá dúhá quide-o.

Tàú-ó să tnàhá tnúhu-o ndĭhi Yá Ndiöxí

¹⁹ Te cue dútú nĭ xóo cunuu nŭú ñăyiu isràél cue téé-áⁿ nĭ xóo quíhu-güedé xití cuártú ní cuu íí víhí-gă. Dico nchoo cuè ñăyiu ndècu ichi Xítohó Jesucrístú vitna tàú-ó să nĭ yuhu ni iní-ó tnàhá tnúhu-o ndĭhi Yá Ndiöxí. Te cuu tnahá tnúhu-o ndĭhi-gá chi Xítohó Jesucrístú ní sati níhĭ-gă te ní xíhí-gá núú cùrúxí. ²⁰ Te cada iní-ó să dđó să nĭ xíndedí nàcuáa ní xóo quíhu-güedé xití cuártú ní cuu íí víhí-gă-áⁿ nĭ xócuĭhĭ, te ducaⁿ càda iní-ó chi Xítohó Jesucrístú ní xíhí-gá cuendá nchoo nĭhí-ó

nàcuáa cada-o ngũndecu váha-o sã cúú-xí-gã. ²¹ Te ðiu-gã cúú-gã Yaá cúú ðütú-ó, te ðiu-gã cúú-gã Dútú cúnũu ndecu-gã núú ndécú Yã Ndiõxí. ²² Núu xíãⁿ xíní ñũhu-xi sá ïo tnahá tnũhu-o ndĩhi Yá Ndiõxí, te vá cání ñⁿ cani úú iní-ó, te ío váha quĩndáá iní-ó-gã chi ðiu-gã ní ndada ndoo ní ndada nine-gã iní-ó cuendá nchoo cùtnuní iní-ó sã ñã túú-gã cuéchi-o ndècu núú-gã. Te ní sandute-o cuendá sá dúcáⁿ ñí nduu ndoo ní nduu nine iní-ó. ²³ Te nchoo càháⁿ ndáá-ó sã ndécú ndĩhi-o tnũhu ndee iní sá ndúú tãhú-ó cùndecu ndĩhi-o Yá Ndiõxí, te xĩni ñũhu-xi sá vã dáñã ndèé-ó cànchicúⁿ nihnu-o tnũhu ndee iní-áⁿ chi Yá Ndiõxí cada-gã nàcuáa ní cachí-gã sá cúú-xí-ó. ²⁴ Te xĩni ñũhu-xi cuhuⁿ iní tnáhá-ó te chindee tnàha-o nacuáa ducaⁿ cùu iní tnáhá-gã-ó, te cada-o mèe-ni sá vãha. ²⁵ Te nchoo vã dáñã ndèé-ó nàtacá-ó nũú dácuaàha-o tnũhu Yá Ndiõxí, te vá cadá-ó ðàtná xĩquide ðavá-yu ñã túú-gã cuíní-yu quixí-yu núú dácuaàha-o tnũhu-gã. Chi xĩni ñũhu-xi sá cuãha tnàha-o tnũhu ndee iní canchicúⁿ nihnu-o ìchi-gã, te uuⁿ-gã ducaⁿ tàú-xi cada-o vitna ta cuyatni nduu quixi tucu Xítohó Jesucrìstú ñuyíú-a.

²⁶ Te cue ñáyiu sa ní tecú tnùní nàcuáa càháⁿ tnũhu Yá Ndiõxí te núu na ngũita-yu ñucùuⁿ cadá-yu nándi sá cuèhé sá dúhá, te àúⁿ nã cuu ní xihí Xítohó Jesucrìstú cuendá-yu, te ni vã yõo ñⁿ-gã cuú cuendá sá vã cùndècu-gã cuéchi-yu núú Yã Ndiõxí. ²⁷ Te núu ducaⁿ na càdá-yu nándi sá cuèhé sá dúhá, te ío quiyùhú iní-yu nàcuáa cada ñaha Yã Ndiõxí xií-yu. Chi nchaa ñáyiu cùu úhú iní ñáhá xii-gã daquihíⁿ ñáhá-gã xií-yu núú ñũhú núú càyú núú ïo ndohó-yu. ²⁸ Te nchaa ñáyiu

ní xóo daquèe tihú tnũhu ní cáháⁿ ndíi Moisés, te núu ndècu úú àdi úní ñáyiu càháⁿ ndáá sá dúcáⁿ ñí dáquée tĩhũ-yu tnúhu ní cáháⁿ ndíi, te vá yõo ñí xóo cundàhú iní ñáhá xii nchaa ñáyiu ducaⁿ ñí xóo cada chi ní xóo cahni ñaha-güedě. ²⁹ Te núu ducaⁿ ñí ndoho cue ñáyiu ducaⁿ ñí dáquée tihú tnũhu ní cáháⁿ ndíi Moisés-áⁿ, te uuⁿ-gá ndoho cue ñáyiu dàquee tihú ñáhá xii Xítohó Jesucristú Yaá cúú Dèhe Yá Ndiõxí ñiu-ni ñáyiu càchí sá ñà túú nàndíhi níñí-gã. Te níñí-gã-áⁿ ñí sati, te ní xihí-gá, te ducaⁿ ñí cuu cuendá cada Yá Ndiõxí ingá núú sã vãha sá cúú-xí nchòo ñáyiu ndècu ñuyúú-a dàtná ní cachí-gá cada-gá. Te ñiu-ni cuendá níñí-gã-áⁿ ñí nduu ndoo ní nduu nine iní cue ñáyiu-áⁿ ní cùu, te ñiu-ni ñáyiu-áⁿ càháⁿ úhú-yu Espiritú Yá Ndiõxí sá chindèe chítúu ñaha xii-o. ³⁰ Te nchoo sà naha-o sá Yá Ndiõxí càchí-gá ñí xichi núú tütú-gá: “Yúhú cada-í te nacháhu ñáyiu nchaa sá quidě-yu, te ñuha càháⁿ-í chi nachinaa-í cuendá nchaa sá quidě-yu-áⁿ”, ñuha càchí-gá. Te sa ñaha tucu-o nacuaá càháⁿ-xi núú tütú-gá núú càchí-xi: “Yá Ndiõxí cada ndáá-gá cuendá nchaa sá quidě ñáyiu cùu cuendá-gá”, ñuha càchí-xi núú tütú-gá. ³¹ Te ío ndàhú ndoho cue ñáyiu na dàndoho ñaha Yá Ndiõxí, te ñiu-gá cúú-gã Yaá cúnùu nchaa nduu nchaa quíú!

³² Te chí dándàcu iní nàcuáa ní quide-ndo cũtnàhá vitna cuu saa ní tecú tnùní-ndó tnũhu Yá Ndiõxí, chí dàvã-áⁿ ñí quide càhnu iní-ndó cuèi nándi sá ñí yáha-ndo cuendá-gá. ³³ Te dava-ndo ñí quide úhú ñáhá ñáyiu xii-ndo núú chítú núú tàcá, te nándi tnúhu cuèhé tnúhu ñuha ní xáhãⁿ-yu

xii-ndo. Te dava-ndo ñ cuyi-ni-ndo ñ xíndecu ndihi tnàha-ndo cuéi nándi ní ndoho dava-gá-ndó.

³⁴ Te ní cundàhú iní-ndó cuè ñáyiú yìhi vecaá, te cuéi ní quendeé ñáyiú sá ndécú ndihi-ndo dico ñá túú ní ndǐhú iní-ndó chi ní cudíi-ni iní-ndó. Te ducaⁿ ñ quide-ndo chi sa nàha-ndo sá ndúú tǎhú-ndó sǎ ïo-gá váha, te xǎⁿ cundecu ndihi-ndo ñi caa ñi quíhíⁿ.

³⁵ Te xǎⁿ vá dáñá ndèe-ndó quèndáá iní-ndó nàcuáa ní cachí Yǎ Ndiǒxí cada ñaha-gǎ xii-ndo, chi sáá nduu te ío váha cada ñaha-gǎ xii-ndo. ³⁶ Te nchòhó xíní ñùhu-xi ío cada ndee iní-ndó càda-ndo nchaa nacuáa càháⁿ Yǎ Ndiǒxí, te ducaⁿ te nduu tǎhú-ndó sǎ ñ cachí-gá nduu tǎhú-ndó cùndecu ndihi-ndo ñi caa ñi quíhíⁿ.

³⁷ Te Yá Ndiǒxí càchí-gá núú tütú-gá:

Ta cùyatni vií-nǎ nduu quixi Yaá quixi ñuyíú-a, te vá cùyàa-gá.

³⁸ Te nchaa ñáyiú cùndáá núu-í ñá túú dàña ndeé-yu sàndáá iní ñáhǎ-yu xii-í, te cuèndá xǎⁿ cundecu-ní-yu ichi-í, dico núu na dàñá-yu ichi-í te vá cúú vǎha iní-í núú-yu.

Duha càchí Yǎ Ndiǒxí núú tütú-gá.

³⁹ Dico nchoo chi ñá túú cùu-o ñáyiú ducaⁿ xíquide dàñá-ó ichi Yá Ndiǒxí, chi cùu-o ñáyiú nchìcúⁿ nihnu-ni sàndáá iní-ó-gǎ, te sá dúcáⁿ te nduu tǎhú-ó cùndecu-o ndihi-gá ñi caa ñi quíhíⁿ, te ñá túú cùu-o ñáyiú dàña nihnu ichi-gá te xíta nihnú-yu.

11

Ñáyiú sàndáá iní ñáhá xì Yá Ndiǒxí

¹ Te núu sàndáá ndisa iní-ó Yă Ndiöxí te ducaⁿ cùtnuní ndáá iní-ó sǎ ñihí-ó sǎ cuìní-ó nǔú-gǎ. Te núu sàndáá iní-ó-gǎ te ducaⁿ cùtnuní ndáá tucu iní-ó sǎ càháⁿ ndáá-gǎ cuendá nchaa sá ñà túú xìní-ó. ² Te ducaⁿ ñi quide ñáyiu ní xíndecu ndéé sanaha ío ní sándáá iní-yu Yá Ndiöxí te xǎⁿ nǔu ío váha ní cuu iní ñáhá-gǎ xií-yu.

³ Te núu nchoo sàndáá ndisa iní-ó Yă Ndiöxí te cùtnuní ndáá iní-ó sǎ sǎ cuendá tnúhu ní cáháⁿ-gǎ ní cuáha andiú ndìhi ñuyíú-a. Te cùtnuní iní-ó sǎ ñà díú sǎ cuendá ìⁿ sá túu ndèhe-o ío ñuyíú-a ní cuáha andiú ndìhi ñuyíú-a.

⁴ Te ndíi Àbél ío ní sándáá iní ndíi Yá Ndiöxí nǔu xǎⁿ ío-gǎ ní cuu iní-gǎ sá ñi sáñaha ndií ní nduu táhú-gǎ dàcúúxí sǎ ñi sáñaha ndíi Cǎin xii-gǎ ní nduu táhú-gǎ. Te ndíi Àbél-áⁿ ñi cutnùní iní ndíi sá ñi cudìu ndíi núú Yă Ndiöxí cuendá sá ñi queheⁿ cuendá-gǎ sá ñi sáñaha ndíi ní nduu táhú-gǎ. Te cuèi ñà túú-gǎ ndíi ndècu ñuyíú-a dico yòdo tnuní sá ñi sándáá iní ndíi Yá Ndiöxí cuendá ducaⁿ càda-o canchicúⁿ nihnu-o.

⁵ Te té Ènóc téé ní xíndecu ndéé sanaha ñà túú ní xǎhí-dé chi ní nacuaca ñaha túu Yá Ndiöxí xii-dé cuendá sá ñi sándáá iní ñáhá-dé xii-gǎ. Te vá yòo ñi nànihí ñáhá xii-dé chi mee-gǎ ní nacuaca ñaha-gǎ xii-dé. Te núu tùtú Yă Ndiöxí càchí-xi sá cǔtnàhá vátá nácuàca ñaha-gǎ xii té Ènóc, te ní quide-dé mee-ñi nàcuáa ní cuu váha iní ñáhá-gǎ xii-dé. ⁶ Te nchaa ñáyiu ñà túú sàndáá iní ñáhá xii Yá Ndiöxí ñà ndácǔ-yu cadá-yu nàcuáa cudìú-yu núú-gǎ, chi nchaa ñáyiu cuìní tuha ñaha xii-gǎ xini ñùhu-xi sá quíndáá iní-yu sá ndécú-gǎ, te quíndáá

iní-yu sá nŭu na nànducu nihnu ñahá-yu xii-gá te cuáñaha-gă xii-yu sá ndúú tǎhŭ-yu.

⁷ Te Yá Ndiöxí ní dátŭha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáhaⁿ Yá Ndiöxí cada ndíi, te ní cadúha ndíi ñⁿ bàrcú cuèndá xití bàrcú-áⁿ quée ndíi ndíhi nchaa ñáyiu vehe ndíi cuèndá cácu nihnú-yu. Te ducaⁿ ñⁿ quide ndíi chi ní sándáá iní ndíi Yá Ndiöxí. Te sá dúcáⁿ ñⁿ sándáá iní ndíi-áⁿ Yá Ndiöxí xiǎⁿ ní cutnùní sá ncháá ñáyiu ío ndècu cuéchi-yu, chi ñá túú ní cǎnchicúⁿ nihnú-yu cadá-yu nàcuáa ní quide ndíi. Te sá dúcáⁿ ñⁿ quide ndíi ní sándáá iní ndíi Yá Ndiöxí xiǎⁿ ío ní cundáá ndíi núú-gă.

⁸ Te Yá Ndiöxí ní xáhaⁿ-gă xii ndíi Àbrahám sá quée ndíi ñuú núú ndécú ndíi quíhíⁿ ndíi ñngá xichi cundecu ndíi. Te ní quide ndíi nàcuáa ní xáhaⁿ Yá Ndiöxí chi ní quee ndíi cuáháⁿ ndíi núú cuáñaha Yá Ndiöxí cundecu ndíi. Te òré ní quee ndíi núú ndécú ndíi te ñá túú ní cùtnuní iní ndíi ndéé cúú núú cuáháⁿ ndíi cundecu ndíi. Te ducaⁿ ñⁿ quide ndíi chi ní sándáá iní ndíi Yá Ndiöxí. ⁹ Te sá dúcáⁿ ñⁿ sándáá iní ndíi Yá Ndiöxí nŭu xiǎⁿ ní xíndecu ndíi núú ñⁿ sáñaha-gă cundecu ndíi, te cuéi ducaⁿ dico ñá túú ní quide ñuú ndíi xiáⁿ. Te ní xóo cundecu ndíi vehe cùtexínu vehe dóó. Te ñu-ni ducaⁿ ñⁿ quide ndíi Isáac ndíhi ndíi Jàcób chi tñahá cue ndíi-áⁿ ñⁿ cachí Yá Ndiöxí sá ndúú tǎhú cue ndíi xiáⁿ cundecu cue ndíi. ¹⁰ Te ducaⁿ ñⁿ quide ndíi Àbrahám chi ní xíndetu ndíi ndéé ní sáá nduu ndúu tǎhú ndíi cundecu ndíi núú ndécú Yá Ndiöxí. Te núú ndécú-gă-áⁿ cúú-xí ñuú ní cadúha mee-gă, te ñuú-áⁿ cudíi-xi ñⁿ caa ñⁿ quíhíⁿ.

¹¹ Te ndíi Sǎrá, sa ní xídó cuá ndíi sá cóó ñehe

ndíi chi sa ní sahnú vèhi ndíi, dico Yá Ndiöxí ní quide-gá te ní xóo ìⁿ déhe ndíi. Te ducaⁿ chi ní sándáá iní ndíi Yá Ndiöxí te ní cutnùní ndáá iní ndíi sá cádá-gă nàcuáa ní xáhaⁿ-gă xii ndíi. ¹² Te cuèi ío ní sahnú ndíi Àbrahám ndìhi ñadìhí ndíi, ndíi Sără dico dacuitíi ñi nduu táhũ-yu ní xóo ìⁿ déhe-yu. Te xíãⁿ nõu ío cuéhé ndĩquíⁿ yává ndíi Àbrahám ní cáyá dàtná cuéhé chòdíní ndèé andiu, ndìhi dàtná cuéhé ñuhu cúchí làmár, chi ni vǎ yõo ìⁿ ndacu cahu ñaha xii-yu sá cuèhẽ-yu.

¹³ Te cue ndíi-áⁿ ducaⁿ-ni ñi sándáá iní cue ndíi Yá Ndiöxí ndéé ní sáá nduu ñi xíhí cue ndíi. Te cue ndíi-áⁿ ñà túú ní nduu táhú cue ndíi quini cue ndíi nchaa nàcuáa ní cachí Yá Ndiöxí cada-gá, dico ní cutnùní ndáá iní cue ndíi-áⁿ nàcuáa cada-gá núú cuáháⁿ núú vèxi. Te ío ní cudíi iní cue ndíi, te ní cachí cue ndíi sá dicó-ni ichi yáha cue ndíi ñuyíú-a, chi ñá díú ñuyíú-a cundecu ducaⁿ cuè ndíi. ¹⁴ Te sá dúcáⁿ ndùu tnúhu ní cáháⁿ cue ndíi-áⁿ, xíãⁿ ní cutnùní sá cuìní cue ndíi ìngá xichi núú cùndècu cue ndíi. ¹⁵ Te ni ñà díú ñùú núú ñi quee cue ndíi ñi cuìní cue ndíi núhú cue ndíi. Chi núu ducaⁿ ni sàni iní cue ndíi te núhú cue ndíi ñi cùu. ¹⁶ Dico ñáhá chi cuìní cue ndíi quíhíⁿ cue ndíi ìⁿ xichi núú vǎha-gá cáá cùndecu cue ndíi. Te núú dúcáⁿ ìo-gá váha càa-áⁿ cúú-xí ñùú núú ndécú Yá Ndiöxí, te sá dúcáⁿ ñi sani iní cue ndíi xíãⁿ nõu ío váha cùu iní Yá Ndiöxí càchí-gá sá ñà túú cùcahaⁿ núú-gă cúú-gă Ndiöxí cue ndíi-áⁿ, te cùtnuní iní-ó sǎ ndáá sá dúcáⁿ càháⁿ-gá chi ní quide túha-gá ìⁿ xichi núú cùndècu cue ndíi-áⁿ.

¹⁷ Te ndíi Àbrahám ní xíndecu ìⁿndi-ni déhe ndíi ndìhi ñadìhí ndíi, te cútnàhá ní xito ndéé ñáhá

Yă Ndiöxí xii ndíi ní xícáⁿ-gá déhe ndíi, ndíi Isàác cuendá nduu táhú ñáhá-gá xii ndíi. Te ní xáhaⁿ ndíi sá cúú ndùu táhú-gá déhe ndíi, te ducaⁿ ñi quide ndíi chi ní sándáá iní ñáhá ndíi xii-gá. Te sa ndècu túha ndíi sá cuãñaha ndíi déhe ndíi xii-gá cuëi mee Yă Ndiöxí ní xáhaⁿ ndáá-gá xii ndíi ¹⁸ sá sã cuendá ndíi Isàác te ngúndecu cue ñaní tnáhá ndíi. ¹⁹ Te ducaⁿ ñi quide ndíi Àbrahám, chi ní cutnùni ndáá iní ndíi sá Yă Ndiöxí ndácú-gã dándòto-gá cuëi ñáyiu sa ní xíhí. Te sá dúcáⁿ ñi xáhaⁿ ndíi xii Yá Ndiöxí sá cúú ndùu táhú-gã déhe ndíi, te xíãⁿ cada iní-ó sã sà ní xíhí ndíi Isàác te ní ndoto tucu ndíi ní nucúndecu ndíi ndíhi tâtá ndíi, ndíi Àbrahám.

²⁰ Te ndíi Isàác ní xícáⁿ táhú ndíi núú Yă Ndiöxí cuendá sá cadá vãha-gá cue déhe ndíi, ndíi Jácób ndíhi ndíi Esàù núú cuàháⁿ núú vëxi. Te ducaⁿ ñi quide ndíi chi ní sándáá iní ndíi Yá Ndiöxí. ²¹ Te sa ta cùyatni-ná nduu cùú ndíi Jácób, te ní xícáⁿ táhú ndíi núú Yă Ndiöxí cuendá cue déhe ñaní ndíi déhe ndíi Chèé. Te yítuu-ná ndíi tatnu ndíi ní chiñuhu ndíi Yá Ndiöxí. Te ducaⁿ ñi quide ndíi chi ní sándáá iní ñáhá ndíi xii-gá. ²² Te cútnàhá sa ta cùyatni vii-nã nduu cùú ndíi Chèé, te ní cachí ndíi sá cuè ñáyiu isràèl sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cadá-yu yiqui cùñú ndíi na sáá nduu quèé-yu núú ndécũ-yu-áⁿ. Te ducaⁿ ñi quide ndíi chi ní sándáá iní ndíi Yá Ndiöxí.

²³ Te cútnàhá ní cacu ndíi Moisés te ní chiváha ñaha ñaná ndíi ndíhi tâtá ndíi úní yóó. Te ducaⁿ ñi quide cue ndíi-áⁿ chi ní sándáá iní cue ndíi Yá Ndiöxí. Te ní quide cuendá cue ndíi-áⁿ sã ïo váha càa ndíi Moisés déhe cue ndíi, te ñã túú ní yùhú cue ndíi nàcuáa ní cáháⁿ téé cùu Faraón sá cáhni-dë

cue landú. ²⁴ Te sátá nǐ sahnú ndíi Moisés te duuⁿ duuⁿ ní cachí ndíi sá vǎ cǎháⁿ ñáyiú sá dǎhe yoco tée cùu Faraón cúú nǎná ndíi. Te ducaⁿ nǐ quide ndíi chi ní sándáá iní ndíi Yá Ndiǒxí. ²⁵ Te ducaⁿ nǐ quide tucu ndíi chi ní tnahá-gá iní ndíi ndoho ndíi ndihí nchaa ñáyiú cùu cuendá Yǎ Ndiǒxí dàcúúxí sǎ cúdíi iní ndíi cundecu tnaa ndíi ichi cuèhé ichi duha. ²⁶ Chi ní sani iní ndíi sá vǎha-gá ndoho ndíi cúcuèhé ñáhá cuè ñáyiú xii ndíi sá cuendá Yaá quixi ñuyíú-a dàcúúxí sǎ cùndècu ndihí ndíi nchaa sá ío Ègiptú. Te ducaⁿ nǐ quide ndíi chi ní xúhuⁿ iní ndíi sá Yǎ Ndiǒxí cuañaha-gǎ sá ndúú tǎhú ndíi. ²⁷ Te ndíi Moisés ní quee ndíi nàcióⁿ Ègiptú te ñá túú ní quide cuendá ndíi sá ío cùdééⁿ tée cùu Faraón núú ndíi. Te ducaⁿ nǐ quide ndíi chi ní sándáá iní ndíi Yá Ndiǒxí. Te ní quide cǎhnu iní ndíi cuendá nchaa sá nǐ yáha ndíi, te ní quide iní ndíi sá Yǎ Ndiǒxí ndécú ndihí ñaha túu-gá xii ndíi cuèi ñá túú ní xíní núú ñáhá ndíi xii-gá. Te ducaⁿ nǐ sani iní ndíi chi Yá Ndiǒxí ndécú ndihí ñaha-gá xii ndíi.

²⁸ Te ndíi Moisés cúú ndíi tée ní tausaha nǐ quide vico pàscuá ndihí cue ñáyiú isràél, te dàvǎ-áⁿ nǐ táúchíúⁿ ndíi ní sahní-yu mbéé te níñí quiti-áⁿ nǐ dácánùú-yu yuyèhé-yu. Te ducaⁿ nǐ quide ndíi chi ní sándáá iní ndíi Yá Ndiǒxí. Te ducaⁿ nǐ quide tucu ndíi cuendá sá espíritú sá nǐ tendaha Yǎ Ndiǒxí cahni-xi mee-ni dǎhe tée déhe díhna cue ñáyiú Ègiptú, te vǎ cǎhni-xí nǐ ìⁿ déhe cue ñáyiú isràél. ²⁹ Te ndute làmár sá nání Mǎr Tícuèhé ní quée dava-xi ní natúu ñuhu yìchí ní níhí nǐ yáha cue ñáyiú isràél. Te ducaⁿ nǐ cuu chi ní sándáá iní-yu Yá Ndiǒxí. Te cue tée Ègiptú tnahá-güedé

nchìcúⁿ-güedé cuáháⁿ dico ñá túú ní ndàcu-güedé yáha-güedé chi ní ndihì-güedé ní cáhá.

³⁰ Te cue ñáyiú isràél ní dúcúⁿ ndéé-yu úsá nduu ñúú Jericó te ní ngoyo nchaa sá ñúdòco. Te ducaⁿ ñí cuu chi ní sándáá iní-yu Yá Ndiöxí. ³¹ Te ìⁿ ñaha ní xíndecu ichi dǐí iní ní xínani-aⁿ Ràháb, ñaha-áⁿ ñà túú ní xíhí-aⁿ dàtná ní xíhí nchaa ñáyiú ío ní cuu sàá iní-xi núú Yá Ndiöxí, chi ní cuu váha iní-aⁿ núú cuè téé ní tendaha cuè ñáyiú isràél ní sángoto dayuhu ñùú-aⁿ. Te ducaⁿ ñí quide-aⁿ chi ní sándáá iní-aⁿ Yá Ndiöxí.

³² Te núu dícó sá cúú te cáháⁿ-í cuèndá ndíi Gedèón, ndihì cuèndá ndíi Bàrác, ndihì cuèndá ndíi Sànsón, ndihì cuèndá ndíi Jèfté, ndihì cuèndá ndíi Dàvíí, ndihì cuèndá ndíi Sàmuel, ndihì cuèndá nchaa cue téé ní xóo cáháⁿ tnúhu Yá Ndiöxí ndéé sanaha, te nchaa cuèndá cue téé-áⁿ cáháⁿ-í te núu dícó cùyáchí-í dico ñá túú cùyáchí-í. ³³ Te nchaa cue ndíi-áⁿ ni sàndáá iní cue ndíi Yá Ndiöxí nùu xíⁿ ní xóo ndacu cue ndíi ní xóo nàà cue ndíi ndihì nchaa ñáyiú dava-gá ñúú. Te nchaa ñáyiú-áⁿ ñà túú ní xóo ndacú-yu nàà-yu ndihì cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gǎ xii cue ndíi. Te cuèi nchaa cue quiti dééⁿ ñà túú ní ndàcu-güedi ná cada ñaha-güedi xii cue ndíi.

³⁴ Te ní xóo ndacu cue ndíi ní xóo ndahvá cue ndíi ñuhú sá vǎ yóo tnàhí ndàcu ndahvá, te ní cácu cue ndíi vá yóo ni ndàcu cahni ñaha xii cue ndíi. Te cue ndíi-áⁿ ñà túú nihí ndéé cuè ndíi ni cùu, dico ní nihí ndéé cuè ndíi chi Yá Ndiöxí ní chindee ñàha-gá xii cue ndíi, te nchaa ndíi-áⁿ ío ní nihí ndéé cuè ndíi ní nàà cue ndíi ndihì nchaa ñáyiú ní cuu úhú iní ñáhá xii cue ndíi, te nchaa ñáyiú ducaⁿ ñí xóo nàà

ndihí cue ndí-áⁿ ñà túú ní xõ ndacú-yu nàá ndihí ñàhá-yu xii cue ndí chi ní xóo cunú-yu. Te ducaⁿ ñí cuu chi ní sándáá iní cue ndí Yá Ndiõxí. ³⁵ Te dava ñáyiú ðihí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tùcú-yu.

Te dava ñáyiú ío ní dándóhó ñàha tnaha ñáyiú-yu te ní xihí-yu, dico ñá túú ní dàñá-yu ichi váha nàcuáa cácu nihnú-yu núú tnàha ñáyiú-yu, te ducaⁿ chi ní cuiní-yu sá ndótõ-yu ndéé cuéé-gá nàcuáa ngúndecu váha-yu núú ndécú Yá Ndiõxí. ³⁶ Te dava cue ndí ío ní ndoho cue ndí chi ío ní cudíquí ndéé ñáhá ñáyiú xii cue ndí, te ní caníhá-yu xii cue ndí, te dava cue ndí ní dácútú ñàhá-yu, te ní chihi ñàhá-yu xii cue ndí vecaá. ³⁷ Te dava cue ndí ní sahní ñàhá-yu ndihí yúú. Te dava cue ndí ní chidava ndáá ñáhã-yu ní xehndé ñáhã-yu ndihí sierrá. Te dava cue ndí ní xito ndéé ñáhã-yu te núú ndisa sá sándáá iní cue ndí Yá Ndiõxí, te dava cue ndí ní sahní ñàhá-yu ndihí machítí. Te mee-ní ñì mbéé ndihí ñì chivá, ní xóo cuu dóo cue ndí. Te mee-ní ñì cue quití-áⁿ ñí xóo cuu dóo cue ndí cuéi ndèni ní cuu ní xóo caca cuu cue ndí. Te mee-ní cuè téé ndàhú ní cuu cue ndí. Te ío ní xóo dandihú-yu iní cue ndí, te nándi sá ñí xóo cada ñàhá-yu xii cue ndí ní xóo dandòho ñàhá-yu. ³⁸ Te cue ndí-áⁿ ío-gá ní xínduu váha iní cue ndí dàcúxí nchàa dava-gá ñáyiú. Te nchaa cue ndí-áⁿ ñí xica cuu cue ndí cuéi nchaa núú ñà túú vã yõ tnàhí ndècu, te cuéi xití yucu ní xica cuu cue ndí. Te ní xóo cada vehe cue ndí nchaa yaú cava. Te ndèni ní cuu nchí yaú ní xóo cundecu cue ndí. ³⁹ Te ío ní cudíu cue ndí núú Yá Ndiõxí cuèndá sá ni

sàndáá iní ñáhá cuè ndíi xii-gá. Te cuèi ducaⁿ ñí quide cue ndíi dico ñá túú ní xíní cue ndíi nchaa sá ñí cachí Yă Ndiöxí cada-gá. ⁴⁰ Te ducaⁿ ñí cuu chi ñⁿ sá ïo-gá váha ní cachí Yă Ndiöxí cada-gá. Te sá dúcáⁿ ïo-gá váha ní cachí-gá cada-gá cúú-xí cuèndá nchoo ndíi cuèndá cue ndíi-áⁿ cuèndá sá ñà díú mèe-ni cue ndíi-áⁿ cundáá cue ndíi núú-gá, chi tñahá nchoo cundáá-ó núú-gá.

12

Ío cuhuⁿ iní-ó Xítóhó Jesucristú

¹ Te cue ñáyiu ní xíndecu ndéé sanaha ñí quidé-yu nàcuáa ní cutnùní sá ñí sándáá iní-yu Yă Ndiöxí. Te cada iní-ó sã ncháá ñáyiu-áⁿ xíndéhé ñáhá-yu xii-o vitna. Núu xiăⁿ xíní ñùhu-xi sá vă cáda-ó ñí ñⁿ sá cuèhé sá dúhá chi ñíu nchaa xiăⁿ quidé-xí ñà túú cundáá-ó núú Yă Ndiöxí. Te vá cáda cuèndá-ó nchaa sá quidé tñèñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó càchicúⁿ nihnu-o càda-o nchaa nacuáa ní cachí-gá cada-o cundecu-o ñuyú-a. ² Te ío cuhuⁿ iní-ó Xítóhó Jesucristú, chi ñíu-gá ní quide ní sándáá iní-ó Yă Ndiöxí, te ñíu-ni ducaⁿ quide-gá cuèi vitna te cuèi ndéé núú cuàháⁿ núú vèxi ñíu-ni ducaⁿ càda-gá sá quíndáá iní-ó Yă Ndiöxí. Te Xítóhó Jesucristú ío ní quide ndee ñí-gá ní ndoho-gá te ní xíhí-gá núú cùrúxí, te ñá túú ní quide cuèndá-gá cuèi ñⁿ sácáⁿ núú cúú-xí sã dúcáⁿ ñí ndoho-gá. Te ducaⁿ ñí quide-gá chi sa nàha-gá sá ná yàha sá dúcáⁿ ndòho-gá te ío cudíí ñí-gá. Te vitna nùcòo-gá xio cùha núú nùcòo Yă Ndiöxí te tàxi tñuní-gá.

³ Te xíní ñùhu-xi sá ïo cada cuèndá-ndó nàcuáa ní quide Xítóhó Jesucristú chi Yaá-áⁿ ïo ní quide

càhnu iní-gá nchaa sá nǐ ndoho-gá ní quide ñaha nchàa ñáyiu ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuendá sá vǎ túu dusaⁿ-ndo, te ni vǎ nátũhú iní-ndó càda-ndo nchaa nacuáa càháⁿ-gá. ⁴ Te nchòhó dáquèe tihú-ndó nchàa sá cuèhé sá dúhá dico vátá cáhni ñaha-gá-yu xii-ndo sǎ dúcáⁿ quide-ndo. ⁵ Te ndacu iní-ndó nàcuáa càháⁿ Tǎtá-ó Dũtú Ndiõxí dásàhú ñáhá-gǎ xii nchoo cuè ñáyiu cùu dèhe-gá. Te duha càchí-gá núú tütú-gá:

Nchòhó cue dèhe mee-ĩ, vá cání iní-ndó sǎ àuⁿ nǎ cuu dándoho ñaha-í xii-ndo,
te ni vǎ nátũhú iní-ndó òré càháⁿ-í dóho-ndo nàcuáa cada-ndo cùndecu-ndo.

⁶ Chi mee-ĩ dándòho-í nchaa ñáyiu cùu iní-í cuendá sá cúndǎá-yu núù-í,
te quide úhú-í-yu, te diu-ní-yu cùú-yu ñáyiu càchí-í cúú dèhe-í.

Duha càchí-gá núú tütú-gá. ⁷ Te ío cada ndee iní-ndó sǎ dúcáⁿ dándoho ñaha Yá Ndiõxí xii-ndo, chi quide-gá sá cúú-gǎ Tǎtá-ó. Te ñá túú nì ìⁿ tée cùu tátá te cachí-ó sǎ ñà túú sànu ichi-dé cue dèhe-dé nàcuáa tàú-xi cunduu. ⁸ Te núu Yá Ndiõxí ñá túú dándoho ñaha-gá xii-ndo dàtná dándòho-gá cue ñáyiu càchí-gá cúú dèhe-gá, te ñá díú dèhe mee-gǎ cúú-ndó te núu ducaⁿ, chi cùu-ndo datná cue ñáyiu ñá túú cùtnuní yoo cùu tátá-xi. ⁹ Te nchoo sǎ naha-o sá cùtnàhá ní cuu landú-ó nǐ sanu ichi ñaha tátá-ó nàcuáa tàú-xi cunduu, te ducaⁿ nǐ xóo canehe-o sǎ yíñuhu núú-güedě te diu-ni ducaⁿ nèhe-o sá yíñuhu núú-güedě vitna. Te núu ducaⁿ nǐ sándáá iní-ó tǎtá-ó, te ío-gá xíní ñuhu-xi quíndáá iní-ó Tǎtá-ó Dũtú Ndiõxí cuendá

ducaⁿ ndùu táhú-ó cùndecu-o ndìhi-gá ni caa ni quíhíⁿ, chi ñiu-gá cúu-gă Yaá ní chihi iní-ó. ¹⁰ Te cútnàhá ní cuu landú-ó, ñá túú tìtní nduu ni càniha tátá-ó ñi sanu ichi ñaha-güedě xii-o nàcuáa ní cuu iní méé-güedě. Te Yá Ndióxi ducaⁿ dândoho ñaha-gá xii-o sànu ichi ñaha-gá cuendá cúu-xí sã vâha sá cúu-xí-ó, te ducaⁿ quide-gá cuendá nchoo càda ndáá-ó dàtná quidé mée-gá. ¹¹ Te òré véxi ñiⁿ tnúndòho sá cúu-xí-ó te ñá túú cùdíí iní-ó chi dândihú iní ñáhá-xí xì-o. Te nchaa ñáyiu ngúnu ichi sá cuendá nchaa tnúndòho-áⁿ te ngüita-yu quide ndáá-yu, te ío vâha cùu iní-yu ndècú-yu.

Vá dáquèe tihú-ó tnũhu Yá Ndióxi

¹² Te núu xíáⁿ ío chí ndúcú ndèe-gá canchicúⁿ nihnu-ndo ichi Xítohó Jesucristú, te vá ñicó yica cùu iní-ndó càncicúⁿ nihnu-ndo ichi-gá. ¹³ Te cada vâha-ndo cùndecu-ndo ichi-gá cuendá nchaa ñáyiu sàni ñiⁿ saní úú iní-xi níhí ndéë-yu cundecú-yu ichi-gá te vá ná tũhú iní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu vâha-ndo ndìhi cue tnaha ñáyiu-ndo, te ío cada vâha-ndo cùndecu-ndo nàcuáa cundáá-ndó núú Yá Ndióxi chí núu vá dúcáⁿ càda-ndo te vá ndúú táhú-ndó cùndecu-ndo ndìhi-gá. ¹⁵ Te ío vâha cada cuendá-ndó nàcuáa cada-ndo cùndecu-ndo, chí núu ñáhá te vá chindée ñaha-gá Yá Ndióxi xii-ndo. Te ío vâha cada cuendá tucu-ndo nàcuáa cundecu-ndo vâ cání cuèhé iní-ndó cuendá Yá Ndióxi, chí núu ducaⁿ na càda-ndo te dava-gá ñáyiu ndècu ndìhi-ndo ichi-gá tnàhá-yu ngüita-yu ducaⁿ càdá-yu, te vá cùndècu vâha-gá-ndó ndìhí-yu ichi-gá. ¹⁶ Te cada cuendá tucu-ndo sã vâ

cúndècu-ndo ichi díí ìní, te ni vǎ dáquèe tihú-ndó nì ìⁿ sá cúú cuendá Yǎ Ndiǒxí dàtná ní guide ndíi Esàú, chi sá cuǎñaha tǎtá ndíi-áⁿ nduu táhú ndíi ni cùu ní dama ndíi ìⁿ cóhó comidá. ¹⁷ Te nchòhó sa nàha-ndo sá cùtnàhá ní cuiní ndíi Esàú cácaⁿ táhú tǎtá ndíi núú Yǎ Ndiǒxí cuendá nchaa sá ndúú táhú ndíi ni cùu, te ñá túú ní xìcáⁿ táhú tǎtá ndíi núú Yǎ Ndiǒxí nàcuáa cuiní méé ndíi ni cùu. Te ní ndáhyú víhí ndíi, te cuèi ducaⁿ ñǎ guide ndíi dico ñá túú ní ndàcu-gá ndíi nàníhí ndíi táhú sǎ ñǎ dama ndíi comidá.

¹⁸ Te cue ñáyiu isràél ní sátuhá-yu ìⁿ yucu núú càyú ñuhú, te nchòhó ñá túú ndéé ducaⁿ sàháⁿ tuha-ndo ìⁿ yucu núú càyú ñuhú dàtná ní guide cue ñáyiu-áⁿ. Te cùtnàhá ducaⁿ ñǎ sátuhá-yu yucu-áⁿ te ní cunee vìhi nihíi yucu-áⁿ, te ní quene táchí ñhi. ¹⁹ Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yǎ Ndiǒxí ní cáháⁿ ndíi ñaha-gǎ xii-yu. Te nchaa ñáyiu ní tecú dóho-xi ní cáháⁿ-gá te ní cuiní-yu sá vǎ càháⁿ-gá. ²⁰ Te ducaⁿ ñǎ quidé-yu chi ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quiti nà yáha xití yucu-a, te cahni-ndo-di ndíi yúú àdi ndíi ìⁿ yutnu puyá”, duha ní cachí-gá. ²¹ Te sá dúcáⁿ ñǎ guide-xi ní xiní-yu xíⁿ ío ní dáyùhú ñáhá-xí xii-yu. Te tnàhá té Moisés ní yùhú-dé, te ní cachí-dé: “Quídi ñaha-xi xii-í sá yùhú-í”, duha ní cachí-dé.

²² Te nchòhó, ñá túú guide-ndo datná ní guide cue ñáyiu-áⁿ ñǎ sàháⁿ tuhá-yu yucu-áⁿ, dico cada iní-ndó sǎ sà ní tuha-ndo yucu Sión sá ndécú núú ndécú Yǎ Ndiǒxí, ndíi ñuuú-gá ñuuú Jerusàlén sá cáá àndíu te díu-gá cúú-gǎ Yaá ndécú nchaa nduu

nchaa quíú. Te ðiu-ni xíaⁿ xĩndecu cuéhé víhí cuè espíritú xínú cuèchi núú-gă²³ chíñùhu ñaha-xi xii-gá. Te nchòhó cúú-ndó cuè ñáyiú cùu cuendá Yă Ndiöxí, te ní tnahá tnúhu-ndo ndìhi nchaa dava-gá ñáyiú cùu cuendá-gá, ñáyiú yòdo tnuní núú tùtú-gá ndécú àndiu, te ðiu-ni ñáyiú-áⁿ cuãñaha-gă xií-yu sá ndúú tãhũ-yu. Te nchòhó ní tuha-ndo Yă Ndiöxí Yaá cada ndáá yícá cuèchi nchaa ñáyiú. Te cada iní-ndó sã ñi tnahá tnúhu-ndo ndìhi cue ñáyiú ní quide ndáá ní xĩndecu ichi Yá Ndiöxí ñuyíú-a. Te ñáyiú-áⁿ ñà túú tnàhí-gá ná cúmăñi-yu vitna ndécú-yu núú-gă.²⁴ Te ní tnahá tnúhu-ndo ndìhi Xítohó Jesucristú Yaá ní quide năcuáa cada Yá Ndiöxí ìngá núú sã vãha sá cúú-xí nchaa nchoo ñáyiú ndècu ñuyíú-a, chi ní sati níñí-gă te ní xihí-gá núú cùrúxí. Te níñí Xítohó Jesucristú ñá túú ñⁿ-ni cuu-xi ndìhi níñí ndíi Àbél, chi ðiu cuendá níñí-gă-áⁿ ñi quide càhnu iní Yă Ndiöxí nchaa cuèchi-o.

²⁵ Núú xíaⁿ ío cada cuendá-ndó vã dáquèe tihú-ndó tnúhu càháⁿ Yă Ndiöxí, chi nchaa ñáyiú ní xĩndecu ndéé sanaha dùcaⁿ ní quidé-yu ní dáquée tĩhũ-yu tnúhu ní cáháⁿ-gá ñuyíú-a sá cúú-xí-yu. Te ñá túú ní cãcu-yu chi ní nacháhu-yu sá dúcáⁿ ñi quidé-yu. Te uuⁿ-gá tucu nchoo chi vá cãcu-o te núu ducaⁿ na dàquee tihú-ó tnúhu càháⁿ Yă Ndiöxí ndéé andiu sã cúú-xí-ó.²⁶ Te cútnàhá ní cáháⁿ Yă Ndiöxí ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ìngá xito ñuyíú, te ñá díú mēe-ni ñuyíú ducaⁿ quidi-í chi tnàhá andiu quidi-í”, càchí-gá.²⁷ Te sá dúcáⁿ càháⁿ-gá sá ìngá

xito tucu ducaⁿ càda-gá xiǎⁿ cútnùní sá ncháándì túhú sá tũu ndèhe-o danaa-gá. Te nchaa sá ñà túú ndèé tũu quini-ó ñùyíú-a xiǎⁿ vá quídí-xí te ni vǎ náá-xí. ²⁸ Te núú ñí cachí Yǎ Ndiǒxí nduu táhú-ó cùndecu-o chi mee-gǎ táxí tnùní-gá xiǎⁿ, te ni vǎ quídí-xí te ni vǎ náá-xí. Te xiǎⁿ ío xìni ñuhu-xi ndacáⁿ táhú-ó nũú-gǎ, te yĩñuhu yĩñuhu cunu cuechi-o núú-gǎ nàcuáa cuu váha iní-gá, te ducaⁿ cùhuⁿ iní-ó sǎ ïo càhnu cuu-gá. ²⁹ Te Tátá-ó Dǔtú Ndiǒxí cúú-gǎ dàtná ìⁿ ñuhú chi danàa-gá nchaa sá ñà túú quide nacuáa cuu váha iní-gá.

13

Nàcuáa tàú-xi cada-o cuèndá cuu váha iní Yǎ Ndiǒxí

¹ Te nchaa nchòhó ñáyiu ndècu ichi Xítóhó Jesu-crístú, vá dáñá ndèé-ndó cùu iní tnáhá-ndó nàcuáa ndècu-ndo ichi-gá. ² Te cunaha-ndo sǎ nũu ío ñáyiu ñũhu ichi ní quexió-yu vehe-ndo te cuáñaha-ndo vèhe ndetatú-yu, te cuáñaha-ndo sǎ cáxǐ-yu. Chi davá-yu ndéé espíritú xínú cuèchi núú Yǎ Ndiǒxí ní sáháⁿ vehé-yu ní queheⁿ cuèndá-yu te ñà túú ní cùtnuní iní-yu sá díú espíritú xínú cuèchi núú-gǎ cúú-xí.

³ Te ndacu tucu iní-ndó cuè ñáyiu xìxíhi vecaá, te cada iní-ndó sǎ tnáhá-ndó yìhi-ndo vecaá ndihí-yu. Te ndacu tucu iní-ndó nchàa ñáyiu ío ndòho, te cada iní-ndó sǎ tnáhá-ndó ndòho-ndo ndihí-yu.

⁴ Te nchaa ñáyiu na càchí-yu sá ìⁿ sá vǎha cùu-xi sá ìⁿ téé ndihí ìⁿ ñadìhí ná ñìhí tnáhǎ-yu candeca tnáhá-yu. Te nchòhó cue téé vá cání iní-ndó cǎhánⁿ

ndihí-ndo ñàdihí te núu ñá díú ñàdihí-ndó cùu-yu. Te ducaⁿ-ni nchòhó cue ñáyiú dèhí tucu vá cání ìní-ndó cǎháⁿ ndihí-ndo tée te núu ñá díú yì-ndo cuu-güedé, chi Yá Ndiõxí dandòho-gá nchaa ñáyiú ndècu ichi díí ìní.

⁵ Te vá cúhúⁿ ìní-ndó mèe-ni díhúⁿ. Te núu nándi cùu nchaa sá ndécú ndihí-ndo te ñiú-ni nchaa xíǎⁿ sa nduu vétú ìní-ndó, chi Yá Ndiõxí ní cachí-gá: “Ní ñⁿ nduu vá dáñá ñhnu ñaha-í xii-ndo, chi nchaa-ni nduu chindee ñaha-í”, duha ní cachí-gá. ⁶ Te xíǎⁿ nñu nchoo ñi yuhu ñi ìní-ó cǎháⁿ-ó ñⁿ ñⁿ-o, te cachí-ó:

Yá Ndiõxí cúu-gǎ Yaá chíndèe ñaha xii-í,
núu xíǎⁿ ñá túú yuhú-í cuèi nándi cǎháⁿ ñáyiú cada ñàhá-yu xii-í.

Duha cachí-ó.

⁷ Chí ndácú ìní cue tée ní sanu ichi ñaha xii-ndo ichi Xítohó Jesucristú cue tée ní cǎháⁿ tnúhu Yá Ndiõxí núu-ndó, te ío váha chí nácuǎha cuendá nàcuáa ní quide nchaa cue tée-áⁿ ñi xíndecu-güedé ndéé ní sáá nduu ñi xíhí-güedé. Te ío quíndáá ìní-ndó Yá Ndiõxí dàtná ní xóo cada cue tée-áⁿ.

⁸ Te dàtná-ni ní quide Xítohó Jesucristú ndéé sanaha ñiú-ni ducaⁿ quide-gá vitna, te ñiú-ni ducaⁿ càda-gá ndéé núu cuaháⁿ núu vèxi. ⁹ Te vá dáñá-ndó mèe-ndo dandahú ñàhá ñáyiú dacáháⁿ ñàhá xii-ndo natuha-ndo ñngá ichi, ñáyiú dànehé tnàha ñáyiú-xi nándi sá ñi cutúha-yu, te nchaa xíǎⁿ ñá túú ñⁿ-ni cǎháⁿ-xi ndihí tnúhu sá ndécú ndihí-ndo. Te Yá Ndiõxí chíndèe ñaha-gá xii-o nàcuáa níhí ndéé-ó cùndecu-o ichi-gá, te ducaⁿ te cuu-xi sá váha sá cúu-xi-ó, te ñá díú cuendá ñⁿ sá xéxi-ó ñihí ndéé-ó ndècu-o ichi-gá. Te dava ñáyiú

càchí-yu sá dává nǔú comidá cuu caxi-o te dava ñáhá nàcuáa níhí ndéé-ó cùndecu-o ichi-gá, dico ñá ndàá sá sǎ dúcáⁿ vǎ cǎxí-ó nchàa núú comidá níhí ndéé-ó cùndecu-o ichi-gá.

¹⁰ Chi Xítóhó Jesucrístú ní xíhí-gá cuèndá-ó nǔú cùrúxí, te nchaa ñáyiu nchìcúⁿ nihnu-ni quide nchaa nacuáa ní quide nchaa dútú nǎ xinu cuechi nǔú Yǎ Ndiǒxí ndéé sanaha, ñáyiu-áⁿ vǎ cúú tnàhá tnúhu-yu ndìhí Xítóhó Jesucrístú Yaá ní xíhí núú cùrúxí sá dúcáⁿ quidé-yu. ¹¹ Chi dútú cùnùu-gá ní xíndecu ndìhí cue ñáyiu isràél, téé-áⁿ nǎ xóo canehe-dé níñí nchaa quiti ní xóo cahni-dé ní xóo quíhu ndéé xítí cuàrtú ní cuu íi-gǎ. Te ducaⁿ nǎ xóo cada dútú-ǎⁿ cuèndá cada càhnu iní Yǎ Ndiǒxí nchaa yícá cuèchi ñáyiu, te cuñú nchaa quiti-áⁿ nǎ xóo cahmi-güedé ìⁿ xio yuhu ñùú. ¹² Te ducaⁿ nǎ yáha Xítóhó Jesucrístú chi ndéé ìⁿ xio yuhu ñùú ní sahni ñaha-güedé xii-gá. Te cuèndá níñí-gǎ sá nǎ sati núú cùrúxí núú nǎ xíhí-gá, ní nduu ndoo ní nduu nine iní cue ñáyiu sàndáá iní ñáhá xii-gá. ¹³ Te vitna chí ná tùha-o Xítóhó Jesucrístú te cada ndee ìní-ó ndòho-o datná ní ndoho-gá. ¹⁴ Te ñuyú-a ni ìⁿ xichi ñá túú ndéé cáá ìⁿ ñuú cudíi ni caa ni quíhíⁿ cuèndá cundecu-o, dico ducaⁿ-ni ñùhu ìní-ó ìⁿ xichi núú ndúú tǎhú-ó cùndecu-o ni caa ni quíhíⁿ.

¹⁵ Te núu xǎⁿ xíní ñùhu-xi sá vǎ dáñá ndéé-ó chĩñuhu-o Dútú Ndiǒxí chi Xítóhó Jesucrístú ní quide-gá nàcuáa ndacu-o tnàhá tnúhu-o ndìhí Yǎ Ndiǒxí, te òré càháⁿ ndìhí-o-gǎ te nuu núu ndacáⁿ tǎhú-ó nǔú-gǎ. Te nchaa tnúhu càháⁿ-ó òré càháⁿ ndìhí-o-gǎ cúú-xi dàtná ìⁿ tǎhú sǎ cúú-xí-gǎ. ¹⁶ Te vǎ dáñá ndéé-ndó càda-ndo mee-ni sá vǎha cun-

decu-ndo, te ducaⁿ chindee tnaha-ndo ìⁿ ìⁿ-ndo ndìhi sá ndécú ndìhi-ndo. Te núu ducaⁿ na càda-ndo te cani iní-ndó sá cúu-xí dàtná ìⁿ táhú sá ïo váha cùu iní Yă Ndiõxí.

¹⁷ Te quindáá iní-ndó càda-ndo nchaa nacuáa càháⁿ cue tée yìndaha ñaha xii-ndo nacuáa ndècu-ndo ichi Xítohó Jesucristú, chi ðiu cue tée-áⁿ quidé cuendá ñáhá-güedě xii-ndo nàcuáa cundecu váha-ndo núu-gă. Te sáá nduu nàceni tnúhu-güedé núu-gă núu ní quide váha-güedé àdi ñá túu ní quide váha-güedé ní xíndecu ndìhi ñaha-güedě xii-ndo. Te núu ducaⁿ na càda-ndo quindáá iní-ndó-güedě te cudíí ìní-güedé cundecu ndìhi ñaha-güedě xii-ndo, te vá ndìhú iní-güedé. Te núu vá dúcáⁿ càda-ndo te vá cúu-xí sá vâha xii-ndo nchàa sá quidé-güedě sá cúu-xí-ndó.

¹⁸ Te càháⁿ ndàhú-í núu-ndó sá càháⁿ ndìhi-ndo Yă Ndiõxí cuendá-ndí. Te nchúhú cùtnùní ndáá iní-ndí sá ñà túu nă cúmăní-ndí núu Yă Ndiõxí, te ducaⁿ chi ndùcu-ndí nàcuáa quide-ndí cundáá-ndí núu-gă. ¹⁹ Te càháⁿ ndàhú tucu-í núu-ndó sá ïo cacăⁿ táhú-ndó núu Yă Ndiõxí cuendá sá mée-gă ná cádá te ïo ndìhi quixi coto ñaha tùcu-í xii-ndo.

Tnúhu ndée núu nĩ ndìhi-ná

²⁰ Te Yă Ndiõxí Yaá quidé cùu váha iní-ó ndècu-o, Yaá-án nĩ dándótó-gă Xítohó Jesucristú. Te Xítohó Jesucristú-án cúu-gă dàtná ìⁿ toli ïo-gá quéné cãva xìto mbéé. Te ducaⁿ sãtnahá-xi cùu-gá cuendá sá nĩ sati níñí-gă te ní xíhí-gá, te ducaⁿ nĩ cuu cuendá sá nĩ quide ndáá-gá ndìhi Yă Ndiõxí sá cádá-gă ìngá núu sá vâha sá cúu-xí nchòo cue ñáyiu ndècu ñuyíú-a. Te nàcuáa ní quide ndáá-gá ndìhi Yă

Ndiöxí te ðiu-ni ducaⁿ càda-xi núú cuàháⁿ núú vëxi. ²¹ Te xicáⁿ táhù-í núú Yã Ndiöxí sá méé-gã ná chindee ñaha-gá xii-ndo cuendá cada-ndo mée-ni sá vãha nàcuáa cuení méé-gã, te mee-gã ná cáda ñaha-gá xii-o nchàa sá vãha sá sání iní-gá. Te ðiu-ni ducaⁿ na tàuchiuⁿ-gá cada Xítóhó Jesucristú sá cúú-xí-ó, duha xicáⁿ táhù-í núú-gã. Te vitna nchaa-o chí ná càchí-ó sã ïo càhnu cuu Xítóhó Jesucristú ni caa ni quíhíⁿ. Te ducaⁿ na cùnduu.

²² Te càháⁿ ndàhú-í núú nchòhó ñáyiu ndècu ndihí-í ichi Xítóhó Jesucristú sá cáda càhnu iní-ndó nàcuáa ndùu nchaa tnúhu càháⁿ-í dásàhú ñáhà-í xii-ndo, chí ñã túú vãi tnúhu chido tnuní-í núú tütú-a sá cúú-xí-ndó.

²³ Te càchí tnúhu-í xii-ndo sã tẽ Timùteú tée ndècu ndihí-o ichi Xítóhó Jesucristú ní cácu-dé ñã túú-gã yíhí-dě vecaá. Te núu na quèxio ndíhí-dé núú ndécù-í te quixi-í ndihí-dé núú ndécú-ndó quèxi coto ñaha-ndí.

²⁴ Te cúñaha-ndo sã ïo na càda ndee iní nchaa cue tée yìndaha ñaha xii-ndo nacúáa ndècu-ndo ichi Yá Ndiöxí. Te ducaⁿ cùñaha tùcu-ndo xii nchaa ðava-gá ñáyiu cùu cuendá-gá sá ïo na càda ndee iní-yu. Te cue ñáyiu nacióⁿ Itàliá ñáyiu ndècu ndihí-o ichi-gá càchí-yu sá ïo cada ndee iní-ndó. ²⁵ Te Yá Ndiöxí ío na chindee chitúu ñaha-gã xii-ndo nchàa-ndo. Te ducaⁿ na cùnduu. Te ío chí cáda ndèe iní-ñã vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939